

北

史

五

蘇子瞻

列傳第一

北史十五

后妃上

魏神元皇后竇氏

文帝皇后封氏

桓皇后惟氏

平文皇后王氏

昭成皇后慕容氏

獻明皇后賀氏

道武皇后慕容氏

道武宣穆皇后劉氏



明元昭哀皇后姚氏

明元密皇后杜氏

太武皇后赫連氏

太武敬哀皇后賀氏

景穆恭皇后郁久閭氏

文成文明皇后馮氏

文成元皇后李氏

獻文思皇后李氏

孝文貞皇后林氏

孝文廢皇后馮氏

孝文幽皇后馮氏

孝文昭皇后高氏

宣武順皇后于氏

宣武皇后高氏

宣武靈皇后胡氏

孝明皇后胡氏

孝武皇后高氏

文帝文皇后乙弗氏

文帝悼皇后郁久閭氏

廢帝皇后宇文氏

恭帝皇后若干氏

孝靜皇后高氏

漢因秦制帝之祖母曰太皇太后母曰皇太后妃曰皇后
餘則多稱夫人隨世增損非如周禮有夫人嬪婦御妻之
數焉魏晉相因時有升降前史言之具矣魏氏王業之兆
雖始於神元然自昭成之前未具言六宮之典而章平思
昭穆惠煬烈八帝妃后無聞道武追尊祖妣皆從帝謚焉
皇后始立中宮餘妾或稱夫人多少無限然皆有品次太
武稍增左右昭儀及貴人椒房等後庭漸已多矣又魏故
事將立皇后必令手鑄金人以成者爲吉不則不得立也

又太武文成保母劬勞之恩並極尊崇之義雖事垂典禮而觀過知仁孝文改定內官左右昭儀位視大司馬三夫人視三公三嬪視三卿六嬪視六卿世婦視中大夫御女視元士後置女職以典內司視尚書令僕作司大監女侍中三官視二品監女尚書美人女史女賢人女書史書女小書女五官視三品中才人供人中使女生才人恭使宮人視四品青衣女酒女饗女食美官女奴視五品及齊神武文襄俱未踐尊極神武嫡妻稱妃其所聘茹茹女稱爲茹茹公主文襄旣尚魏朝公主故無別號兩宮自餘姬侍並稱娘而已文宣後庭雖有夫人嬪御之稱然未具員數

孝昭內職甚少唯楊嬪才貌兼美復是貴家襄城王母桑氏有德行竝蒙恩禮其餘無聞焉河清新令內命婦依古制有三夫人九嬪二十七世婦八十一御女又準漢制置昭儀有左右二人比丞相其弘德正德崇德爲三夫人比三公光猷昭訓隆徽爲上嬪比三卿宣徽凝暉宣明順華凝華光訓爲下嬪比六卿正華令則脩訓曜儀明淑芳華敬婉昭華光正昭寧貞範弘徽和德弘猷茂光明信靜訓曜德廣訓暉範敬訓芳猷婉華明範豔儀暉則敬信爲二十七世婦比從三品穆光茂德貞懿曜光貞凝光範令儀內範穆閨婉德明婉艷婉妙範暉章敬茂靜肅 章穆華

慎儀妙儀明懿崇明麗則婉儀彭脩閑脩靜弘慎懿光
漪容徽淑秀儀芳婉貞慎明懿穆脩範肅容茂儀英淑
弘懿正信凝婉英範懷順脩媛良則瑤章訓成潤儀寧訓
淑懿柔則穆儀脩禮昭慎貞媛肅閑敬順柔華昭順敬寧
明訓弘儀崇敬脩敬承閑昭容麗儀閑華思柔媛光懷德
良媛淑猗茂範良信懿華徽娥肅儀妙則爲八十一御女
比正四品武成好內竝具其負自外又置才人采女以爲
散號後主旣立二后昭儀以下皆倍其數又置左右娥英
比左右丞相降昭儀比二大夫尋又置淑妃一人比相國
周氏率由姬制內職有序文帝創基脩衽席以儉約武皇

嗣歷節情欲於矯枉宮闈有貫魚之美戚里無私溺之尤
可謂得君人之體也宣皇外行其志內逞其欲溪壑難滿
采擇無厭恩之所加莫限斯阜榮之所及無隔險詖於是
升蘭殿以正位踐椒庭而齊體者非一人焉階房帷而拖
青紫緣恩倖而擁玉帛非一族焉雖辛癸之荒淫趙李之
傾惑曾未足比其髮髻也人厭苛政弊事實多文帝之祀
忽諸特由於此隋文思革前弊大矯其違唯皇后當室傍
無私寵婦官位號未詳備焉開皇二年著內官之式略依
周禮省減其數嬪三貢掌教四德視正三品世婦九貢掌
賓客祭祀視正五品女御三十八貢掌女功絲枲視正七

品又采漢晉舊儀置六尚六司六典遞相統攝以掌宮掖
之政一曰尚宮掌導引皇后及閨閣宴賜管司令三人掌
圖籍法式糾察宣奏典琮三人掌琮璽器玩二曰尚儀掌
禮儀教學管司樂三人掌音律之事典贊三人掌導引內
外命婦朝見三曰尚服掌服章寶藏管司飾三人掌簪珥
花嚴典櫛三人掌巾櫛膏沐四曰尚食掌進饌先嘗管司
醫三人掌方藥卜筮典器三人掌罇彝盤盃五曰尚寢掌
帷帳牀褥管司筵三人掌鋪設灑掃典執三人掌扇傘燈
燭六曰尚工掌營造百役管司製衣三人掌衣服裁縫典會
三人掌財帛出入六尚各三員視從九品六司視勳品六

典視流外二品初文獻皇后功參歷試外預朝政內擅宮
闈懷嫉妬之心虛嬪妾之位不設三妃防其上逼自嬪以
下置六十員加又抑損服章降其品秩至文獻崩後始置
貴人三員增嬪至九員世婦二十七員御女八十一員貴
人等關掌宮闈之務六尚以下皆分隸焉煬帝時后妃嬪
御無釐婦職唯端容麗飾陪從宴遊而已帝又參詳典故
自製嘉名著之於令貴妃淑妃德妃是爲三夫人品正第
一順儀順容順華脩儀脩容脩華充儀充容充華是爲九
嬪品正第二婕妤一十二員品正第三美人一十五
員品正第四是爲世婦寶林二十員品正第五御女二十

四員品正第六采女三十七員品正第七是爲女御總一
百二十以叙於宴寢又有承衣刀人皆趨侍左右竝無員
數視六品以下時又增置女官準尚書省以六局管二十
四司一曰尚宮局管司言掌宣傳奏啓司簿掌名錄計度
司正掌格式推罰司闡掌門閤管籥二曰尚儀局管司籍
掌經史教學紙筆几案司樂掌音律司賓掌賓客司贊掌
禮儀贊相導引三曰尚服局管司匱掌琮璽符節司衣掌
衣服司飾掌湯沐巾櫛玩弄司仗掌仗衛戎器四曰尚食
局管司膳掌膳羞司醢掌酒醴醢醢司藥掌醫藥劑司
饌掌廩餼柴炭五曰尚寢局管司設掌牀席帷帳鋪設灑

掃司輿掌輿輦傘扇執持羽儀司苑掌園籞種植蔬菜瓜
果司燈掌火燭六曰尚工局管司製掌營造裁縫司寶掌
金玉珠璣錢貨司綵掌繒帛司織掌織染六尚二十二司
員各二人唯司樂司膳員各四人每司又置典及掌以貳
其職六尚十人品從第五司二十八人品從第六典二十
八人品從第七掌二十八人品從第九女史流外量局閒
劇多者十人以下無定員數聯事分職各有司存焉

魏神元皇后竇氏沒鹿回部大人賓之女也賓臨終誡其
二子速侯回題令善事帝及賓卒速侯等欲因帝會喪為
變語泄帝聞之晨起以佩刀殺后馳使告速侯等言后暴

崩速侯等來赴因執殺之

文帝皇后封氏生桓穆二帝早崩桓帝立乃葬焉文成初穿天泉池獲一石銘稱桓帝葬母氏遠近赴會二十餘萬有司以聞命藏之太廟次妃蘭氏是生思帝

桓皇后惟氏生三子長曰普根次惠帝次煬帝平文崩后攝國事時人謂之曰女國后性猛忌平文之崩后所爲也平文皇后王氏廣甯人也年十三因事入宮得幸於平文生昭成帝平文崩昭成在襁褓時國有內難將害帝子后匿帝於袴中呪曰若天祚未終者汝無聲遂良久不啼得免於難昭成初欲定都於灋源川築城郭起宮室議不決

后聞之曰國自上世遷徙爲業今事難之後基業未固若
郭而居一旦寇來難卒遷動乃止烈帝之崩國祚殆危興
復大業后之力也崩葬雲帝金陵道武即位配饗太廟
昭成皇后慕容氏慕容皝之女也初帝納皝妹爲妃未幾
而崩皝後請繼好遣大人長孫秩逆后皝送于境上后至
有寵生獻明帝及秦明王后性聰敏多智專父理內每事
多從初昭成遣衛辰兄悉勿祈還部落也后誡之曰汝還
必深防衛辰姦猾終當滅汝悉勿祈死其子果爲衛辰
所殺卒如后言建國二十三年崩道武即位配饗太廟
獻明皇后賀氏東部大人野干女也少以容儀選入東宮

生道武苻洛之內侮也后與道武及故臣吏避難北徙俄而高車來抄掠后乘車避賊而南中路失道乃仰天曰國家胤胄豈正爾絕滅也惟神靈扶助遂馳輪正不傾行百餘里至七個山南而免難後劉顯使人將害帝帝姑爲顯弟亢湫妻知之密以告后梁眷亦來告難后乃令帝去之后夜飲顯醉向晨故驚寤中羣馬使起視馬后泣謂曰吾諸子始皆在此今盡亡失汝等誰殺之故顯使不急追道武得至賀蘭部羣情未甚歸附后從弟外朝大人悅舉部隨從供奉盡禮顯怒將害后后奔亢湫家匿神車中三日亢湫舉室請救乃得免會劉顯部亂始得亡歸后弟深

于忌道武之得人心舉兵圍逼行宮后出謂漆子曰汝等
今安所置我而欲殺吾子也漆干慙而去後后少子秦王
觚使于燕慕容垂止之后以觚不反憂念寢疾皇始元年
崩祔葬于盛樂金陵後追加尊謚配饗焉

道武皇后慕容氏寶之季女也中山平入克掖庭得幸左
丞相衛王儀等奏請立皇后帝從儀令后鑄金人成乃立
之封后母孟爲漂陽君後崩

道武宣穆皇后劉氏劉眷女也登國初納爲夫人生華陰
公主後生明元后專理內事寵待有加以鑄金人不成故
不登后位魏故事後宮產子將爲儲貳其母皆賜死道武

末年以舊法薨明元即位追尊謚位配饗太廟自此後
宮人爲帝母皆正配饗焉

明元昭哀皇后姚氏姚興女西平長公主也明元以后納
之後爲夫人后以鑄金人不成本升尊位然帝寵禮如后
是後猶欲正位后謙不當泰常五年薨帝追恨之贈皇后
璽綬而加謚焉葬雲中金陵

明元密皇后杜氏魏郡鄴人陽平王超之妹也初以良家
子選入太子宫有寵生太武及明元即位拜貴嬪泰常五
年薨謚曰貴嬪葬雲中金陵太武即位追尊號謚配饗太
廟又立廟于鄴刺史四時薦祀以魏郡太后所生之邑復

其調役後甘露降于廟庭文成時相州刺史高閭表脩后廟詔曰婦人外成理無獨祀陰必配陽以成天地未聞有華之國立天妣之饗此乃先皇所立一時之至感非經世之遠制便可罷祀先是太武保母竇氏初以夫家坐事誅與二女俱入宮操行純備進退以禮明元命爲太武保母性仁慈帝感其恩訓奉養不異所生及即位尊爲皇太后封其弟漏頭爲遼東王太后訓釐內外甚有聲稱性恬素寡欲喜怒不形於色好揚人之善隱人之過帝征涼州蠕蠕吳提入寇太后命諸將擊走之真君元年崩詔天下大臨三日太保盧魯元監護喪事謚曰惠葬崑山從后意也

初后嘗登崑山顧謂左右曰吾母養帝躬敬神而愛人若死而不滅必不爲賤鬼然於先朝本無位次不可違禮以從園陵此山之上可以終託故葬焉別立后寢廟於崑山建碑頌德

太武皇后赫連氏屈丐女也太武平統萬納后及二妹俱爲貴人後妄爲皇后文成初崩祔葬金陵

太武敬哀皇后賀氏代人也初爲夫人生景穆神龜元年薨追贈貴嬪葬雲中金陵後追號尊謚配饗太廟

景穆恭皇后郁久問氏河東王毗妹也少以才選入東宮有寵生文成皇帝而薨文成即位追尊號謚葬雲中金陵

配饗太廟又文成乳母常氏本遼西人因事入宮乳帝有
劬勞保護之功文成即位尊爲保太后尋尊爲皇太后告
於郊廟和平元年崩詔天下大臨三日謚曰昭葬於廣甯
磨笄山俗謂之鳴雞山太后遺志也依惠太后故事別立
寢廟置守陵二百家樹碑頌德

文成文明皇后馮氏長樂信都人也父朗秦雍二州刺史
西城郡公母樂浪王氏后生於長安有神光之異朗坐事
誅后遂入宮太武左昭儀后之姑也雅有母德撫養教訓
年十四文成踐極以選爲貴人後立爲皇后文成崩故事
國有大喪三日後御服器物一以燒焚百官及中宮皆號

泣而臨之后悲叫自投火左右救之良久乃蘇獻文即位
尊爲皇太后丞相乙渾謀逆獻文年十二居于諒闇太后
密定大策誅渾遂臨朝聽政及孝文生太后躬親撫養是
後罷令不聽政事太后行不正內寵李弈獻文因事誅之
太后不得意遂害帝承明元年尊曰太皇太后復臨朝聽
政太后性聰達自入宮披粗學書計及登尊極省決萬機孝
文詔罷鴈鵠師曹以其地爲太后立報德佛寺太后與孝文
遊于方山顧川阜有終焉之志因謂羣臣曰舜葬蒼梧二
妃不從豈必遠祔山陵然後爲貴哉吾百歲後神其安此
孝文乃詔有司營建壽陵於方山又起永固石室將終爲

清廟焉太和五年起作八年而成刊石立碑頌太后功德
太后以帝富於春秋乃作勸戒歌三百餘章又作皇誥十
八篇文多不載太后立文宣王廟於長安又立思燕佛圖
於龍城皆刊石立碑太后又制內屬五廟之孫外戚六親
總麻皆是復除性儉素不好華飾躬御縵繒而已宰人上
膳案裁徑尺羞膳滋味減於故事十分之八太后嘗以體
不安服菴間子宰人昏而進粥有蠅蛭在焉后舉匕得之
帝時侍側大怒將加極罰太后笑而釋之自太后臨朝專
政孝文雅性孝謹不欲參決事無巨細一禀於太后太后
多智猜忍能行大事殺戮賞罰決之俄頃多有不閑帝者

是以威福兼作震動內外故杞道德王遇張祐符承祖等
拔自微閭歲中而至王公王儉出入卧内數年便為宰輔
賞賚千萬億計金書鐵券許以不死之詔李冲以器能受
任亦由見寵幃幄密加錫賚不可勝數后性嚴明假有寵
侍亦無所縱左右纖介之愆動加捶楚多至百餘少亦數
十然性不宿憾尋亦待之如初或因此更加富貴是以人
人懷於利欲至死而不思退太后曾與孝文幸靈泉池宴
羣臣及蕃國使人諸方渠帥各令為其方舞孝文上壽太
后忻然作歌帝亦和歌遂命羣臣各言其志於是和歌者
九十人太后外禮人望元丕游明根等頒賜金帛輿馬每

至褒美叡等皆引丕參之以示無私又自以過失懼人
議已小有疑忌便見誅戮迄后之崩孝文不知所生至如
李訢李惠之徒猜嫌覆滅者十餘家死者數百人率多枉
濫天下冤之十四年崩於太和殿年四十九其日有雄雉
集于太華殿帝酌飲不入口五日毀慕過禮謚曰文明太
皇太后葬于永固陵中而反虞於顯靈殿詔曰尊旨從儉
不申固極之痛稱情允禮仰損儉訓之德進退思惟倍用
崩感又山陵之節亦有成命內則方丈外裁奄坎脫於孝
子之心有所不盡者室中可一丈墳不得過三十步今以
陵萬世所仰復廣為六十步孤負遺旨益以痛絕其幽房

大小棺槨質約不設明器至於素帳繆茵窆尾之物亦皆
不置此則遵先志從冊令俱奉遺事而有從有違未達者
或以致怪梓宮之裏玄堂之內聖靈所長已一一奉遵仰
昭儉德其餘外事有所不從以盡痛慕之情其宣示遠近
著告羣司上明儉誨之美下彰違命之失及卒哭孝文服
衰近臣從服三司以下外臣衰服者變服就練七品以下
盡除即吉設祔祭於太和殿公卿以下始親公事帝毀瘠
絕酒肉不御者三年初帝孝於太后乃於永固陵東北里
餘營壽宮遂有終焉瞻望之志及遷洛陽乃自表瀍西以
爲山園之所而方山虛宮號曰萬年堂云

文成元皇后李氏梁國蒙縣人母頓丘王峻之妹也后之
生也有異於常父方叔恒言此女當大貴及長姿質美麗
太武南征永昌王仁出壽春軍至后宅因得后及仁鎮長
安遇事誅后與其家人送平城宮高祖登白樓望見美之
乃下臺后得幸於齊庫中遂有娠常太后後問后知之時
守庫者亦私書於壁記之別加驗問皆符同及生獻文拜
貴人太安二年太后令依故事令后具條記在南兄弟及
引所結宗兄洪之悉以付託臨決每一稱兄弟拊膺慟泣
遂薨死後謚曰元皇后葬金陵配饗太廟

獻文思皇后李氏中山安喜人南郡王惠之女也少安德婉

淑年十八以選入東宮獻文即位爲夫人生孝文帝皇興三年薨葬金陵承明元年追崇號謚配饗太廟

孝文貞皇后林氏平涼人也父勝位平涼太守叔父金閭起自閭官獻文初爲定州刺史爲乙渾所誅及勝兄弟皆死勝無子有二女入掖庭后容色美麗得幸於孝文生皇子恂以恂將爲儲貳太和七年后依舊制薨帝仁恕不欲襲前事而宣示文明太后意故不果行謚曰貞皇后葬金陵及恂以罪賜死有司奏追廢后爲庶人

孝文廢皇后馮氏太師熙之女也太和十七年孝文既終喪太尉元丕等表以長秋未建六宮無主請正內位孝文

從之立后爲皇后恩遇甚厚孝文後重引后姊昭儀至洛
稍有寵后禮愛漸衰昭儀自以年長且前入宮掖素見待
念輕后而不率妾禮后雖性不妬忌時有愧恨之色昭儀
規爲內主譖構百端尋廢后爲庶人后貞謹有德操遂爲
練行尼後終於瑤光佛寺

孝文幽皇后亦馮熙女母曰常氏本賤微得幸於熙熙元
妃公主薨後遂主家事生后與北平公夙文明太皇太后
欲家世貴寵乃簡熙二女俱入掖庭時年十四其一早卒
后有姿媚偏見愛幸未幾疾病太后乃遣還家爲居帝猶
留念焉歲餘而太后崩帝服終頗存訪之又聞后素疹瘥

除遣閹官雙三念璽書勞問遂迎赴洛陽及至寵愛過本
初當夕宮人稀復進見拜爲左昭儀後立爲皇后帝頻歲
南征后遂與中官高菩薩私亂及帝在汝南不豫后便公
然醜恣中常侍雙蒙等爲其心腹是時彭城公主宋王劉
昶子婦也年少嫠居北平公馮后之同母弟也后求婚
於孝文孝文許之公主志不願后欲強之婚有日矣公主
密與侍婢及僮從十餘人乘輕車冒霖雨赴懸瓠奉謁孝
文自陳本意因言后與菩薩亂狀帝聞因駭愕未之信而
秘匿之此後后漸憂懼與母常氏求託女巫禱厭孝文疾
不起一旦得如文明太后輔少主稱命者賞報不貲又取

三牲宮中祔祠假言祈福專爲左道母常或自詣宮中或遣侍婢與相報荅帝至洛執問菩薩雙蒙等具得情狀帝以疾臥含溫室夜引后并列菩薩等於戶外后臨入令搜衣中稱有寸刃便斬后頓首泣謝乃賜坐東楹去御筵二丈餘孝文令菩薩等陳狀又讓后曰汝有祿術可具言之后乞屏左右有所密狀孝文敕中常侍悉出唯令長秋卿白整在側取衛直刀拄之后猶不言孝文乃以綿堅塞整耳自小語再三呼整無所應乃令后言事隱人莫知之高祖乃喚彭城北海二王令入坐言昔是汝嫂今便他人但入勿避又曰此老嫗欲白刃插我肋上可窮問本末勿有

所難又云馮家女不能復相廢逐且使在宮中空坐有心
乃能自死汝等勿謂吾猶有情也帝素至孝猶以文明太
后故未行廢二王出乃賜后辭死訣再拜稽首涕泣及入
宮後帝命中官有問於后后罵曰我天子婦當面對豈令
汝傳也帝怒刺后母常入示與后狀常撻之百餘乃止帝
尋南伐后留京師雖以罪失寵而夫人嬪妾奉之如法唯
令世宗在東宮無朝謁之事帝疾甚謂彭城王勰曰後宮
久乖陰德自絕於天吾死後可賜自盡別宮葬以后禮庶
掩馮門之大過帝崩梓宮達魯陽乃行遺詔北海王詳奉
宣遺旨長秋卿白整等入授后藥后走呼不肯引決曰官

豈有此也是此諸王輩殺我耳整等執持強之乃含椒而盡梓宮次洛南咸陽王禧等知審死相視曰若無遺詔我兄弟亦當作計去之豈可令失行婦人宰制天下殺我輩也謚曰幽皇后葬長陵塋內

孝文文昭皇后高氏司徒公肇之妹也父颺母蓋氏凡四男三女皆生於東廂孝文初乃舉室西歸近龍城鎮鎮表后德色婉豔及至文明太后親幸北部曹見后奇之入掖庭時年十三初后幼曾夢在堂內立而日光自窓中照之灼灼而熱后東西避之光猶斜照不已如是數夕怪之以白其父颺颺以問遼東人閔宗宗曰此奇徵也昔有夢

入懷猶生天子況日照之徵此女將被帝命誕育人君之
象也後生宣武及廣平王懷樂安公主馮昭儀寵盛密有
母養帝心后自代如洛陽暴薨於汲郡之共縣或云昭儀
所賊也宣武之爲皇太子二日一朝幽后后拊念慈愛有
加孝文出征宣武入朝必久留后宮親視櫛沐母道隆備
其後有司奏請加號謚曰文昭貴人孝文從之宣武踐阼
追尊配饗后先葬在長陵東南陵制卑局因就起山陵號
終寧陵置邑戶五百家明帝時更上尊號太后以同漢晉
之典正姑婦之禮廟號如舊文昭遷靈櫬於長陵北內西
北六十步初開終寧陵數文於梓宮上獲大蛇長丈餘黑

色頭有王字蟄而不動靈輓既遷還置蛇舊處

宣武順皇后于氏太尉烈弟勁之女也宣武始親政事烈時爲領軍總心膂之任以嬪御未備左右諷諭稱后有容德帝乃迎入爲貴人時年十四甚見寵愛立爲皇太后靜默寬容性不妬忌生皇子三歲夭沒其後暴崩宮禁事祕莫能知悉而世議歸咎于高夫人葬永泰陵謚曰順皇后宣武皇后高氏文昭皇后弟優之女也宣武納爲貴嬪生皇子早夭又生建德公主後拜爲皇后甚見禮重性妬忌宮人希得進御及明帝即位上尊號曰皇太后尋爲居居瑤光寺非大節慶不入宮中建德公主始五六歲靈太后

出觀母武邑君時天文有變靈太后欲以當禍是夜暴崩天下寃之喪還瑤光佛寺殯皆以足禮初孝文幽后之寵也欲專其愛後宮接御多見阻遏孝文時言于近臣稱婦人妬防雖王者亦不能免況士庶乎宣武高后悍忌嬪御有至帝崩不蒙侍接者由是在洛二十餘年皇子全育者唯明帝而已

宣武靈皇后胡氏安定臨涇人司徒國珍女也母皇甫氏產后之日赤光四照京兆山北縣有趙胡者善於卜相國珍問之胡云賢女有大貴之表方爲天地母生勿過三人知也后姑爲尼頗能講宣武初入講禁中積歲諷左右后

有姿行帝聞之乃召入掖庭爲充華世婦而椒庭之中以國舊制相與祈祝皆願生諸王公主不願生太子唯后每稱夫人等言何緣畏一身之死而令皇家不育冢嫡也明帝在孕同列猶以故事相恐勸爲諸計后固意確然幽夜獨誓但使所懷是男次第當長子子生身死不辭旣誕明帝進爲充華嬪先是宣武頻喪皇子自以年長深加慎護爲擇乳保皆取良家宜子者養於別宮皇后及充華皆莫得而撫視焉及明帝踐阼尊后爲皇太妃後尊爲皇太后臨朝聽政猶曰殿下後改令稱詔羣臣上書曰陛下自稱曰朕太后以明帝沖幼未堪親祭欲傍周禮夫人與君交

獻之義代行祭禮禮官博議以爲不可而太后欲以幃幔
自鄣觀三公行事重問侍中崔光光便據漢和熹鄧后薦
祭故事太后大悅遂攝行初祀太后性聰悟多才藝姑旣
爲居幼相依託略得佛經大義親覽萬機手筆斷決幸西
林園法流堂命侍臣射不能者罰之又自射針孔中之大
悅賜左右布帛有差先是太后敕造申訟車時御焉出自
雲龍大司馬門從宮西北入自千秋門以納寬訟又親策
孝秀州郡計吏於朝堂太后與明帝幸華林園宴羣臣于
都亭曲水令王公以下賦七言詩太后詩曰化光造物含
氣貞明帝詩曰恭已無爲賴慈英王公以下賜帛有差太

后父薨百寮表請公除太后不許尋幸永寧寺觀建刹於九級之基僧尼士女赴者數萬人及改葬文昭高后太后不欲令明帝主事乃自爲喪主出至終寧陵親奠遣事還哭於太極殿至於訖事皆自主焉後幸嵩高山夫人九嬪公王以下從者數百人升于頂中廢諸淫祀而胡天神不在其例尋幸闕口溫水登鷄頭山自射象牙簪一發中之敕示文武時太后逼幸清河王懌姪亂肆情爲天下所惡領軍元乂長秋卿劉騰等奉明帝於顯陽殿幽太后於北宮於禁中殺懌其後太后從子都統僧敬與備身左右張車渠等數十人謀殺乂復奉太后臨朝事不克僧敬坐從

邊車渠等死胡氏多免黜後明帝朝太后於西林園宴文武侍臣飲至日夕乃起至太后前自陳外云太后欲害己及騰太后合云無此語遂至于極昏太后乃起執明帝手下堂言母子不聚久今暮共一宿諸大臣送我入太后與帝向東北小閣左衛將軍奚康生謀殺又不果自劉騰死又寬怠太后與明帝及高陽王雍爲計解又領軍太后復臨朝大赦改元自是朝政踈緩威恩不立天下牧守所在貪恠鄭儼汙亂宮掖勢傾海內李神軌徐紇並見親侍一二年中位總禁要手握王爵輕重在心宣淫於朝爲四方之所穢文武解體所在亂逆土崩魚爛由於此矣僧

敬又因聚集親族遂涕泣諫曰陛下母儀海內豈宜輕脫
如此大怒自是不召僧敬內爲朋黨防蔽耳目明帝所親
幸者太后多以事害焉有蜜多道人能胡語帝置於左右
太后慮其傳致消息三月三日於城南大巷中殺之方懸
賞募賊又於禁中殺領左右鴻臚少卿谷會紹達帝所
親也母子之間嫌隙屢起鄭儼慮禍乃與太后計因潘嬪
生女妄言皇子便大赦爲武泰元年復陰行鴆毒其年二
月明帝暴崩乃奉潘嬪女言太子即位經數日見人心已
安始言潘嬪本實生女今宜更擇嗣君遂立臨洮王子釗
爲主年始二三歲天下愕然及尔朱榮稱兵度河太后盡

召明帝六宮皆令入道太后亦自落髮榮遣騎拘送太后及幼主於河陰太后對榮多所陳說榮拂衣而起太后及幼主竝沈於河太后妹馮翊君收瘞於雙靈寺武帝時始葬以后禮而追加謚曰靈

孝明皇后胡氏靈太后從兄冀州刺史盛之女靈太后欲榮重門族故立爲皇后明帝頗有酒德專嬖充華潘氏后及嬪御竝無過寵太后爲帝選納抑屈人流時博陵崔孝芬范陽盧道約隴西李璿等女俱爲世婦人訴訟咸見忿責武泰初后旣入道遂居於瑤光寺

孝武皇后高氏齊神武長女也帝見立乃納爲后及帝西

幸關中降為彭城王韶妃

文帝文皇后乙弗氏河南洛陽人也其先世為吐谷渾渠帥居青海號青海王涼州平后之高祖莫瓌擁部落入附拜定州刺史封西平公自莫瓌後三世尚公主女乃多為王妃甚見貴重父瓌儀同三司兖州刺史母淮陽長公主孝文之第四女也后美容儀少言笑年數歲父母異之指示諸親曰生女何妨也若此者實勝男年十六文帝納為妃及帝即位以大統元年冊為皇后后性好節儉蔬食故衣珠玉羅綺絕於服玩又仁恕不為嫉妬之心帝益重之生男女十二人多早夭唯太子及武都王戌存焉時新都

關中務欲東討蠕蠕寇邊未遑北伐故帝結婚以撫之於是更納悼后命后遜居別宮出家為尼悼后猶懷猜忌復徙后居秦州依子秦州刺史武都王帝雖限大計恩好不忘後密令養髮有追還之意然事祕禁外無知者六年春蠕蠕舉國度河前驅已過夏頗有言虜為悼后之故興此役帝曰豈有百萬之衆為一女子舉也雖然致此物論朕亦何顏以見將帥邪乃遣中常侍曹寵璽手敕令后自盡后奉敕揮淚謂寵曰願至尊享千萬歲天下康寧死無恨也因命武都王前與之決遺語皇太子辭皆悽愴因慟哭久之侍御咸垂涕失聲莫能仰視召僧設供令侍婢數十

人出家手爲落髮事畢乃入室引被自覆而崩年三十一
穀麥積崖爲龕而葬神柩將入有二叢雲先入龕中頃之
一滅一出後號寂陵及文帝山陵畢手書云萬歲後欲令
后配饗公卿乃議追謚曰文皇后祔於太廟廢帝時合葬
於永陵

文帝悼皇后郁久間氏蠕蠕主阿那瓌之長女也容貌端
嚴夙有成智大統初蠕蠕屢犯北邊文帝乃與約通好結
婚扶風王孚受使奉迎蠕蠕俗以東爲貴后之來營幕居
席一皆東向車七百乘馬萬疋駝千頭到黑鹽池魏朝國
簿文物始至孚奏請正南面后曰我見魏主故蠕蠕女也

魏仗向南我自東面孚無以辭四年正月至京師立爲皇后時年十四六年后懷孕將產居於瑤華殿聞上有狗吠聲心甚惡之又見婦人盛飾來至后所后謂左右此爲何人醫巫傍侍悉無見者時以爲文后之靈產訖而崩年十六葬於少陵原十七年合葬永陵當會橫橋北后梓宮先至鹿苑帝輶輶後來將就次所軌折不進

廢帝皇后字文氏周文帝女也后初產之日有雲氣滿室芬氲久之幼有風神好陳列女圖置之左右周文曰每見此女良慰人意廢帝之爲太子納爲妃及即位立爲皇后志操明秀帝深重之專寵後宮不置嬪御帝旣廢崩后亦

以忠於魏室罹禍

恭帝皇后若干氏司空長樂正公惠之女也有容色恭帝納之爲妃及即位立爲皇后後出家爲尼在佛寺薨竟無謚孝靜皇后高氏齊神武之第二女也天平四年詔婢以爲皇后神武前後固辭帝不許興和初詔司徒孫騰司空襄城王昶等奉詔致禮以后駕迎於晉陽之丞相第五月立爲皇后大赦齊受禪降爲中山王妃後降于尚書左僕射楊遵彥

列傳第一

北史十三

方洽周益周

之冕孫

粹然

校正

列傳第三

北史十四

后妃下

齊武明皇后婁氏

蠕蠕公主郁久間氏

彭城太妃尔朱氏小尔朱氏

上黨太妃韓氏

馮翊太妃鄭氏

高陽太妃游氏馮娘李娘

文襄敬皇后元氏琅邪公主

文宣皇后李氏段昭儀薛嬪王嬪

孝昭皇后元氏

武成皇后胡氏

弘德李夫人

後主皇后斛律氏

後主皇后胡氏

後主皇后穆氏

馮淑妃

周文皇后元氏

文宣皇后叱奴氏

孝閔皇后獨孤氏

明皇后獨孤氏

武皇后阿史那氏

武皇后李氏

宣皇后楊氏

宣皇后朱氏

宣皇后陳氏

宣皇后元氏

宣皇后尉遲氏

靜皇后司馬氏

隋文獻皇后獨孤氏

宣華夫人陳氏

容華夫人蔡氏

煬帝皇后蕭氏

齊武明皇后婁氏諱昭君贈司徒內干之女也少明悟強族多甥之並不肯行及見神武城上執役驚曰此真吾夫也乃使婢通意又數致私財使以甥已父母不得已而許焉神武既有澄清之志傾產以結英豪密謀祕策后恒參預及拜勃海王妃閹闈之事悉決焉后高明嚴斷雅遵儉約徃來外舍侍從不過十人性寬厚不妬忌神武姬侍咸加恩待神武嘗將西討出師后夜孿生二男一女左右以

危急請追告神武后弗聽曰王出統大兵何得以我故輕
離軍幕死生命也來復何爲神武聞之嗟嘆良久沙苑敗
後侯景屢言請精騎二萬必能取之神武悅以告于后后
曰若如其言豈有還理得獺失景亦有何利乃止神武逼
於蠕蠕欲娶其女而未決后曰國家大計願不疑也及茹
茹公主至后避正室處之神武愧而拜謝焉曰彼將有覺
願絕勿顧慈愛諸子不異己出躬自紡績人賜一袍一袴
手縫戎服以帥左右弟昭以功名自達其餘親屬未嘗爲
請爵位每言有材當用義不以私亂公文襄嗣位進爲太
妃文宣將受魏禪后固執不許帝所以中止天保初尊爲

皇太后宮曰宣訓濟南即位尊爲太皇太后尚書令楊愔等受遺詔輔政踈忌諸王太皇太后密與孝昭及諸大將定策誅之下令廢立孝昭即位復爲皇太后孝昭崩太后又下詔立武成帝太寧二年春太后寢疾衣忽自舉用巫媪言改姓石氏四月辛丑崩於北宮時年六十二五月甲申合葬義平陵太后凡孕六男二女皆感夢孕文襄則夢一斷龍孕文宣則夢大龍首尾屬天地張口動目勢狀驚人孕孝昭則夢蠕龍於地孕武成則夢龍浴於海孕魏二后竝夢月入懷孕襄城博陵二王夢鼠入衣下后未崩有童謠曰九龍母死不作孝及后崩武成不改服緋袍如故

未幾登三臺置酒作樂宮女進白袍帝怒投諸臺下和士
開請止樂帝大怒搃之帝於昆季次寔九蓋其徵驗也
蠕蠕公主者蠕蠕主郁久閭阿那瓌女也蠕蠕強盛與西
魏通和欲連兵東伐神武病之令杜弼使蠕蠕為世子求
婚阿那瓌曰高王自娶則可神武猶豫尉景與武明皇后
及文襄並勸請乃從之武定三年使慕容儼往聘之號曰
蠕蠕公主八月神武迎於下館阿那瓌使其弟秃突佳來
送女且報聘仍戒曰待見外孫然後返國公主性嚴毅一
生不肯華言神武嘗有病不得往公主所秃突佳怨恚神
武自射堂輿疾就公主其見將護如此神武朋友襄從蠕

蠕國法蒸公主產一女焉

彭城太妃尔朱氏榮之女魏孝莊后也神武納爲別室敬重踰於嬖妃見必束帶自稱下官神武迎蠕蠕公主還尔朱氏迎於木井北與蠕蠕公主前後別行不相見公主引角弓仰射翔鷗應弦而落妃引長弓斜射飛鳥亦一發而中神武喜曰我此二婦竝堪擊賊後爲后神武爲起佛寺天保初爲太妃及文宣狂酒將無禮於太妃太妃不從遂遇禍小尔朱者兆之女也初爲建明皇后神武納之生任城王未幾與趙郡公琛私通徙於靈州後適范陽盧景璋上黨太妃韓氏軌之妹也神武微時欲嫖之軌母不許及

神武貴韓氏夫已死乃納之

馮翊太妃鄭氏名大車嚴祖妹也初爲魏廣平王妃遷鄴後神武納之寵冠後庭生馮翊王潤神武之征劉蠡升文襄蒸於大車神武還一婢告之二婢爲證神武杖文襄一百而幽之武明后亦見隔絕時彭城尔朱太妃有寵生王子浹神武將有廢立意文襄求救於司馬子如子如來朝僞爲不知者請武明后神武告其故子如曰消難亦姦子如妾如此事正可覆蓋妃是王結髮婦常以父母家財奉王王在懷朔被杖背無完皮妃晝夜供給看瘡後避葛賊同走并州貧困然馬屎自作靴恩義何可忘夫婦相宜女

配至尊男承大業又婁領軍勲何宜搖動一女子如草芥
況婢言不必信神武因使子如鞠之子如見文襄尤之曰
男兒何意畏威自誣因教二婢反辭脅告者自縊乃啓神
武曰果虛言神武大悅召后及文襄武明后遙見神武一
步一叩頭文襄且拜且進父子夫妻相泣乃如初神武乃
置酒曰全我父子者司馬子如賜之黃金百三十斤文襄
贈良馬五十疋

高陽太妃游氏父京之爲相州長史神武克鄴欲納之京
之不許遂牽曳取之京之尋死游氏於諸太妃中最有德
訓諸王公主婚嫁常令主之馮娘者子昂妹也初爲魏任

城王妃適尔朱世隆神武納之生浮陽公主李娘者延寔從妹也初爲魏城陽王妃又王娘生永安王浚穆娘生陽平王淹竝早卒不爲太妃

文襄敬皇后元氏魏孝靜帝之姊也孝武帝時封馮翊公主而歸於文襄容德兼美曲盡和敬初生河間王孝琬時文襄爲世子三日而孝靜幸世子第贈錦綵及布帛萬匹世子辭求通受諸貴禮遺於是十屋皆滿次生兩公主文宣受禪尊爲文襄皇后居靜德宮及天保六年文宣漸致昏狂乃移居於高陽之宅而取其府庫曰吾兄昔姦我婦我今須報乃淫於后其高氏女婦無親疏皆使左右亂交

之於前以葛爲絙令魏安德主騎上使人推引之又命胡人苦辱之帝又自呈露以示羣下武平中后崩祔葬義平陵琅邪公主名玉儀魏高陽王斌庶生妹也初不見齒爲孫騰妓騰又放棄文襄遇諸途悅而納之遂被殊寵奏魏帝封焉文襄謂崔季舒曰尔由來爲我求色不如我自得一絕異者崔遲必當造直諫我亦有以待之及遲諮事文襄不復假以顏色居三日遲懷刺墜之於前文襄問何用此爲遲悚然曰未得通公主文襄大悅把遲臂入見焉季舒語人曰崔遲常忿吾佞在大將軍前每言叔父合殺及其自作佞乃佞過於吾王儀同產姊靜儀先適黃門郎

崔枯文襄亦幸之皆封公主括父子由是超授賞賜甚厚焉

文宣皇后李氏諱祖娥趙郡李希宗女也容德甚美初爲太原公夫人及帝將建中宮高隆之高德正言漢婦人不
可爲天下母宜更擇美配楊愔固請依漢魏故事不改元
妃而德正猶固請廢后而立段昭儀欲以結勲貴之援帝
竟不從而立后焉帝好捶撻嬪御乃至有殺戮者唯后獨
蒙禮敬天保十年改爲可賀敦皇后孝昭即位降居昭信
宮號昭信皇后武成踐阼逼后淫亂云若不許我當殺尔
兒后懼從之後有娠太原王紹德至閣不得見愠曰兒豈

不知邪姊姊腹大故不見兒后聞之大慙由是生女不舉
帝橫刀詔曰尔殺我女我何不殺尔兒對后前築殺紹德
后大哭帝愈怒裸后亂搗撻之號天不已盛以絹囊流血
淋漓投諸渠水良久乃蘇犢車載送妙勝尼寺后性愛佛
法因此爲尼齊亡入關隋時得還趙郡段昭儀韶妹也婚
夕韶妻元氏爲俗弄女壻法戲文宣文宣銜之後因發怒
謂韶曰我會殺尔婦元氏懼匿婁太后家終文宣世不敢
出昭儀才色兼美禮遇殆同正嫡後主時改適錄尚書唐
邕王嬪者琅邪人也嬪姊先適崔脩文宣竝幸之數數降
其夫家超用脩爲尚書郎薛嬪者本倡家女也年十四五

時爲清河王岳所好其父求內宮中大被嬖寵其姊亦俱
進御文宣後知先與岳通又爲其父乞司徒公帝大怒先
鋸殺其姊薛嬪當時有娠過產亦從戮

孝昭皇后元氏開府元蠻女也初爲常山王妃天保末賜
姓步六孤孝昭即位立爲皇后帝崩從梓官之鄴始度汾
橋武成聞后有奇藥追索之不得使閹人就車頓辱降居
順成宮武成旣殺樂陵王元被閹隔不得與家相知宮闈
內忽有飛語帝令檢推得后父兄書信元蠻由是坐免官
后以齊亡入周氏宮中隋文帝作相放還山東

武成皇后胡氏安定胡延之女其母范陽盧道約女初懷

孕有胡僧詣門曰此宅瓠蘆中有月旣而生后天保初選
爲長廣王妃產後主曰有鴉鳴於產帳上武成崩尊爲皇
太后陸媼及和士開密謀殺趙郡王叡出婁定遠高文遙
爲刺史和陸諂事太后無所不至初武成時后與諸閹人
褻狎武成寵幸和士開每與后握槊因此與后女奴通自武
成崩後數出詣佛寺又與沙門曇獻通布金錢於獻席下
又挂寶裝胡牀於獻屋壁武成平生之所御也乃置百僧
於內殿託以聽講日夜與曇獻寢處以獻爲昭玄統僧徒
遙指太后以弄曇獻乃至謂之爲太上者帝聞太后不謹
而未之信後朝太后見二少臣悅而召之乃男子也於是

曩獻事亦發皆伏法并殺元山王三郡君皆太后之所昵也帝自晉陽奉太后還鄴至紫陌卒遇大風兼舍人魏僧伽明風角奏言即時當有暴逆事帝詐云鄴中有急轡弓纏鞘馳入南城令鄧長顓幽太后北宮仍有敕內外諸親一不得與太后相見久之帝迎復太后太后初聞使者至大驚慮有不測每太后設食帝亦不敢嘗周使元偉來聘作述行賦敘鄭莊公剋段而遷姜氏文雖不工當時深以爲愧齊亡入周恣行姦穢開皇中殂

弘德夫人李氏趙郡李叔讓女也初爲魏靜帝嬪武成納焉生南陽王仁盛爲太妃姊爲南安王思妃坐夫反以燒

死太妃聞之發狂而薨文宣王嬪及中人盧勣又妹武成
竝以爲嬪武成崩後胡后令二嬪自殺二嬪悲哭後主爲
之惻愴私遺衣物令出外避焉盧養淮南王後爲太妃又
有馬嬪亦得幸爲后所妬自縊死彭樂任祥竝有女因坐
父兄事皆入宮爲文宣所幸武成以彭爲夫人養齊安王
任生丹楊王竝爲太妃

後主皇后斛律氏左丞相光之女也初爲皇太子妃後主
受禪立爲皇后武平三年正月生女帝欲悅光詐稱生男
爲之大赦光誅后廢在別宮後令爲左齊滅嫁爲開府元
仁妻

後主皇后胡氏隴東王長仁女也胡太后失母儀之道深
以爲愧欲求悅後主故飾后於宮中令帝見之帝果悅立
爲弘德夫人進左昭儀大被寵愛斛律后廢陸媼欲以穆
夫人代之太后不許祖孝徵請立胡昭儀遂登爲皇后陸
媼旣非勸立之意在穆夫人其後於太后前作色而言曰
何物親姪女作如此語言太后問有何言曰不可道固問
之乃曰語大家云太后行多非法不可以訓太后大怒喚
后出立剃其髮送令還家帝思之每致詩以通意後與斛
律廢后俱召入內數日而鄴不守後亦改嫁云

後主皇后穆氏名邪利本斛律后從婢也母名輕霄本穆

子倫婢也轉入侍中宋欽道家姦私而生后莫知氏族或云后即欽道女子也小字黃花後字舍利欽道婦妬輕霄面黥爲宋字欽道伏誅黃花因此入宮有幸於後主宮內稱爲舍利大監女侍中陸大姬知其寵養以爲女薦爲弘德夫人武平元年六月生皇子怛於時後主未有儲嗣陸陰結待以監撫之任不可無主時皇后斛律氏丞相光之女也慮其懷恨先令母養之立爲皇太子陸以國姓之重穆陸相對又奏賜姓穆氏胡庶人之廢也陸有助焉故遂立爲皇后大赦初有折衝將軍元正烈於鄴城東水中得一璽以獻文曰天皇后爾璽蓋石氏所作詔書頒告以爲穆后

之瑞焉武成爲胡后造真珠裙襦所費不可稱計被火燒
後主旣立穆皇后復爲營之屬周武曹太后喪詔侍中薛
孤康買等爲弔使又遣商胡齎錦綵三萬疋與弔使同往
欲市真珠爲皇后造七寶車周人不與交易然而竟造焉
先是童謠曰黃花勢欲落清觴滿盃酌言黃花不乂也後
主自立穆后以後昏飲無度故云清觴滿杯酌陸息駱提
婆詔改姓爲穆陸大姬皆以皇后故也后旣以陸爲母提
婆爲家更不採輕霄輕霄後自瘡面欲求見爲大姬陸媼
使禁掌之竟不得見

馮淑妃名小憐大穆后從婢也穆后愛衰以五月五日進

之號曰續命慧黠能彈琵琶工歌舞後主惑之坐則同席
出則竝馬願得生死一處命淑妃處隆基堂淑妃惡曹昭
儀所常居也悉令反換其地周師之取平陽帝獵於三堆
晉州亟告急帝將還淑妃請更殺一圍帝從其言識者以
爲後主名緯殺圍言非吉徵及帝至晉州城已欲沒矣作
地道攻之城陷十餘步將士乘勢欲入帝敕且止召淑妃
共觀之淑妃粧點不獲時至周人以木拒塞城遂不下舊
俗相傳晉州城西石上有聖人跡淑妃欲往觀之帝恐弩
矢及橋故抽攻城木造遠橋監作舍人以不速成受罰帝
與淑妃度橋橋壞至夜乃還稱妃有功勲特立爲左皇后

即令使馳取禕翟等皇后服御仍與之竝騎觀戰東偏少
却淑妃怖曰軍敗矣帝遂以淑妃奔還至洪洞成淑妃方
以粉鏡自玩後聲亂唱賊至於是復走內參自晉陽以皇
后衣至帝為按轡命淑妃著之然後去帝奔鄴太后後至
帝不出迎淑妃將至鑿城北門出十里迎之復以淑妃奔
青州後主至長安請周武帝乞淑妃帝曰朕視天下如脫
屣一老嫗豈與公惜也仍以賜之及帝遇害以淑妃賜代
王達甚嬖之淑妃彈琵琶因絃斷作詩曰雖蒙今日寵猶
憶昔時憐欲知心斷絕應看膝上弦達妃為淑妃所譖幾
致於死隋文帝將賜達妃兄李詢令著布裙配春詢母逼

令自殺後主以李祖欽女爲左昭儀進爲左娥英裴氏爲
右娥英娥英者兼取舜妃娥皇女英名陽休之所制樂人
曹僧奴進一女大者忤旨剝面皮少者彈琵琶爲昭儀以
僧奴爲日南王僧奴死後又貴其兄弟妙達等二人同日
皆爲郡王爲昭儀別起隆基堂極爲綺麗陸媼誣以左道
遂殺之又有董昭儀毛夫人彭夫人王夫人小王夫人二
李夫人皆嬖寵之毛能彈箏本和士開薦入帝所幸彭夫
人亦音妓進死於晉陽造佛寺與摠持相埒一李是隸戶
女以五弦進一李即孝貞之女也小王生一男諸閹人在
傍皆蒙賜給毛兄思安超登武衛董父賢義爲作軍主田

昭儀 亦超登開府自餘姻屬多至大官

周文皇后元氏魏孝武之妹也初封平原公主適開府張歡歡性貪殘遇后無禮帝殺歡改封后爲馮翊公主以配周文帝生孝閔帝魏大統十七年薨恭帝三年十二月合葬成陵孝閔踐阼追尊爲王后武成初又追尊爲皇后

文宣皇后叱奴氏代人也周文帝爲丞相納爲姬生武帝天和三年六月尊爲皇太后建德三年三月崩五月葬永固陵

孝閔皇后元氏名胡摩魏文帝第五女也初封晉安公主帝之爲略陽公也尚焉及踐阼立爲王后帝被廢后出俗

地畧列傳二
十三
山
爲星建德初武帝誅晉公護上帝尊號以后爲孝閔皇后
居崇義宮隋革命后出居里第大業十二年殂

明敬皇后獨孤氏太保衛公信之長女也帝之在藩納爲
夫人二年正月立爲王后四月崩葬昭陵武成初追崇爲
皇后明帝崩與后合葬焉

武成皇后阿史那氏突厥木杆可汗俟斤之女也突厥滅
蠕蠕後盡有塞表之地志陵中夏周文方與齊人爭衡結
以爲援俟斤初欲以女配帝旣而悔之武帝即位前後累
遣使焉保定五年二月詔陳公純許公宇文貴神武公賈
毅南安公楊符等備皇后文物及行殿并六宮以下一百

二十人至侯斤牙所迎后侯斤又許齊婚將有異志純等累請不得反命會雷風大起飄壞其穹廬侯斤大懼以爲天譴乃禮送后純等奉之以歸天和三年三月至武帝接以親迎之禮后有安貌善容止帝深敬禮焉宣帝即位尊后爲皇太后太象元年二月改爲天元皇太后二年二月又尊曰天元上皇太后宣帝崩靜帝尊爲闕太后隋開皇二年殂年三十二隋文詔有司備禮祔葬后於孝陵

武皇后李氏名娥姿楚人也于謹平江陵后家被籍沒至長安周文以后賜武帝後得親幸生宣帝宣政元年七月尊爲帝太后太象元年二月改爲天元帝太后七月又尊

北史列傳二
爲天皇太后二年二月尊爲天元聖皇太后宣帝崩靜帝
尊爲大帝太后隋開皇元年三月出俗爲尼改名常悲八
年殂以臣禮葬于京城南

宣皇后楊氏名麗華隋文帝之長女也帝在東宮武帝爲
帝納后爲皇太子妃宣政元年閏六月立爲皇后帝後自
稱天元皇帝號后爲天元皇后尋又立天皇后及左右皇
后與爲四皇后二年二月詔取象四星於是后及三皇后
竝加大焉冊授后爲天元大皇后又立天中大皇后與后
爲五皇后焉后性柔婉不妬忌四皇后及嬪御等咸愛而
仰之帝後昏暴滋甚喜怒乖度嘗譴后欲加之罪后進止

詳閉辭色不撓帝大怒遂賜后死逼令自引決后母獨孤
氏聞之詣閣陳謝叩頭流血然後得免帝崩靜帝尊后爲
皇太后居弘聖宮初宣帝不豫詔隋文帝入禁中侍疾及
大漸劉昉鄭譯等因矯詔以隋文帝受遺輔政后初雖不
預謀然以嗣主幼冲恐權在他族不利於已聞昉譯已行
此詔心甚悅後知隋文有異圖意頗不平及行禪代憤惋
愈甚隋文內甚愧之開皇初封后爲樂平公主後又議奪
其志后誓不許乃止大業五年從煬帝幸張掖殂於河西
詔還京所司備禮祔葬后於定陵

宣帝后朱氏名滿月吳人也其家坐事没入東宮宣帝之

爲太子后被選掌衣服帝召幸之遂生靜帝大象元年四月改爲天元帝后七月改爲天皇后二年二月又改爲天大皇后后本非良家子又年長於帝十餘歲疎賤無寵以靜帝故特尊崇之班亞楊皇后焉宣帝崩靜帝尊后爲帝太后隋開皇元年二月出俗爲尼改名法淨六年殂以尼禮葬于京城西

宣帝后陳氏名月儀自云潁川人大將軍山提之第八女也大象元年六月以選入宮拜爲德妃月餘日立爲天左皇后二年二月改爲天左大皇后二月又詔以坤儀比德土數惟五四大皇后外增置天中大皇后一人於是以后

爲天中大皇后帝崩后出俗爲尼改名華光后永徽初終
父山提本尔朱兆之隸仕齊位特進開府東兗州刺史謝
陽王武帝平齊拜大將軍封浙陽公大象元年以后父超
授上柱國進鄒國公除太宗伯

宣帝皇后元氏名樂尚河南洛陽人開府晟之第二女也
年十五被選入宮拜貴妃大象元年七月立爲天右皇后
二年二月改爲天右大皇后帝崩后出家爲尼改名華勝
初后與陳皇后同時被選入宮俱拜爲妃及升后又同日
受冊帝寵遇二后禮數均等年齒復同特相親愛及爲尼
後李朱及尉遲后竝相繼殞歿而二后貞觀中尚存后父

北史卷之二
十一
晟少以元氏宗室拜開府大象元年七月以后父進位上柱國封翼國公

宣帝皇后尉遲氏名繁熾蜀公迴之孫女也有美色初適杞公亮子西陽公溫以宗婦例入朝帝逼幸之及亮謀逆帝誅溫追后入宮拜長貴妃大象二年三月立爲天右大皇后帝崩后出俗爲尼改名華道隋開皇十五年殂

靜帝司馬皇后名令姬柱國滎陽公消難之女也大象元年二月宣帝傳位於帝七月爲帝納后爲皇后二年九月隋文帝以后父奔陳廢后爲庶人後嫁爲隋司州刺史李丹妻貞觀初猶存

隋文獻皇后獨孤氏諱伽羅河南洛陽人周大司馬衛公
信之女也信見文帝有奇表故以后妻焉時年十四帝與
后相得誓無異生之子后姊爲周明帝后長女爲周宣帝
后貴戚之盛莫與爲比而后每謙卑自守及周宣帝崩隋
文君禁中摠百揆后使李圓通謂文帝曰騎獸之勢必不
得下勉之及帝受禪立爲皇后突厥嘗與中國交市有明
珠一篋價直八百萬幽州摠管陰壽白后市之后曰當今
戎狄屢寇將士罷勞未若以八百萬分賞有功者百寮聞
而畢賀文帝甚寵憚之帝每臨朝后輒與上方輦而進至
閣乃止使宦官伺帝政有所失隨則匡諫多所弘益侯帝

退朝而同反宴寢相顧欣然后早失二親常懷感慕見公卿有父母者每為致禮焉有司奏曰周禮百官之妻命於王后憲章在昔請依古制后曰以婦人與政或從此漸不可開其源也不許后每謂諸公主曰周家公主類無婦德失禮於舅姑離薄人骨肉此不順事尔等當誡之后姑子都督崔長仁犯法當斬文帝以后故免之后曰國家之事焉可顧私長仁竟坐死異母弟陟以猫鬼巫蠱呪詛於后坐當死后三日不食為之請命曰陟若蠹政害民者不敢言今坐為妾身請其命陟於是減死一等后雅性儉約帝常合止利藥須胡粉一兩宮內不用求之竟不得又欲賜

柱國劉嵩妻織成衣領宮內亦無上以后不好華麗時齊
七寶車及鏡臺絕巧麗使毀車而以鏡臺賜后后雅好讀
書識達今古凡言事皆與上意合宮中稱爲二聖嘗夢周
阿史那后言受罪辛苦求營功德明日言之上爲立寺追
福焉后兄女夫死於并州后嫂以女有娠請不赴葬后曰
婦人事夫何容不往其姑在宜自諂之姑不許女遂行后
頗仁愛每聞大理決囚未嘗不流涕然性尤妬忌後宮莫
敢進御尉遲迴女孫有美色先在宮中帝於仁壽宮見而
悅之因得幸后伺帝聽朝陰殺之上大怒單騎從苑中出
不由徑路入山谷間三十餘里高頻楊素等追及扣馬諫

帝太息曰吾貴爲天子不得自由高嬪曰陛下豈以一婦人而輕天下帝意少解駐馬良久夜方還宮后候上於閣內及帝至流涕拜謝嬪素等和解之上置酒極歡后自此意頗折初后以高嬪是父之家客其見親禮至是聞嬪謂己爲一婦人因以銜恨又以嬪夫人死其妾生男益不善之漸加譖毀帝亦每事唯后言是用后見諸王及朝士有妾孕者必勸帝斥之時皇太子多內寵妃元氏暴薨后意太子愛妾雲氏害之由是諷帝黜高嬪竟廢太子立晉王廣皆后之謀也仁壽二年八月甲子日暈四重己巳太白犯軒轅其夜后崩於永安宮時年五十九葬於太陵其後

宣華夫人陳氏容華夫人蔡氏俱有寵帝頗惑之由是發疾及危篤謂侍者曰使皇后在吾不及此云

宣華夫人陳氏陳宣帝女也性聰慧姿貌無雙及陳滅配掖庭後選入宮為嬪時獨孤皇后性妬後宮罕得進御唯陳氏有寵煬帝之在藩也陰有奪宗之計規為內助每致禮焉進金蛇金駝等物以取媚於陳氏皇太子廢立之際頗有力焉及文獻皇后崩進位為貴人專房擅寵主斷內事六宮莫與為比及帝太漸遺詔拜為宣華夫人初帝寢疾於仁壽宮夫人與皇太子同侍疾平旦更衣為太子所逼夫人拒之得免歸於上所上怪其神色有異問之夫人

泣以實對帝恚曰畜生何堪付大事獨孤誠誤我意謂獻
皇后也因呼兵部尚書柳述黃門侍郎元巖曰呼我兒述
等呼太子帝曰勇也述巖出閣爲敕書訖示左僕射楊素
素以白太子太子遣張衡入寢遂令夫人及後宮同侍疾
者竝就別室俄聞上崩而未發喪也夫人與諸後宮相顧
曰事變矣皆色動股慄晡後太子遣使者齎金合帖紙於
際親署封字以賜夫人夫人見惶懼以爲鴆毒不敢發使
者促之乃發見合中有同心結數枚諸宮人相謂曰得免
死矣陳氏恚而却坐不肯致謝諸宮人共逼之乃拜使者
其夜太子蒸焉煬帝即位出居仙都宮尋召入歲餘而終

時年二十九帝深悼之爲製哀神傷賦

容華夫人蔡氏丹楊人也陳滅以選入宮爲世婦容儀婉
孌帝甚悅之以文獻后故希得進幸后崩後漸見寵遇拜
爲貴人參斷宮掖亞於陳氏帝寢疾加號容華夫人帝崩
後亦爲煬帝所蒸

煬帝愍皇后蕭氏梁明帝歸之女也江南風俗二月生子
者不舉后以二月生由是季父岌收養之未幾岌夫妻俱
死轉養舅張軻家軻甚貧寔皇后躬親勞苦煬帝爲晉王文
帝爲選妃於梁卜諸女皆不吉歸乃迎后於舅氏令使者
占之曰吉遂冊爲妃后性婉順有智識好學解屬文頗知

占候文帝大善之煬帝甚寵敬焉及帝嗣位立爲皇后帝
每游幸未嘗不隨從時后見帝失德心知不可不敢措言
因爲述志賦以自寄焉其詞曰承積善之餘慶備箕箒於
皇庭恐脩名之不立將負累於先靈廼夙夜而匪懈實夤
懼於玄冥雖自強而不息亮愚蒙之多滯思竭節於天衢
才追心而弗逮實庸薄之多幸何隆寵之嘉惠賴天高而
地厚屬王道之升平均二儀之覆載與日月而齊明迺春
生而夏長等品物而同榮願立志於恭儉私自兢於誠盈
孰有念於知足苟無希於濫名惟至德之弘深情弗適於
聲色感懷舊之餘恩求故劍於宸極叨不世之殊眚謬非

才而奉職何寵祿之踰分撫曾襟而未識雖沐浴於恩光
內慙惶而累息顧微躬之寡昧思令淑之良難實不遑於
啓處將有情而自安若臨深而履薄心戰慄其如寒夫居
高而必危每處滿而防溢知恣夸之非道乃攝生於冲謐
嗟寵辱之易驚尚無爲而抱一履謙光而守志且願安乎
容膝珠簾玉帛之奇金屋瑤臺之美雖時俗之崇麗善哲
人之所鄙愧絺綌之不工豈絲竹而喧耳知道德之可尊
明善惡之由己蕩囂煩之俗慮乃伏膺於經史綜箴誡以
訓心觀女圖而作軌遵古賢之令範冀福祿之能緩時循
躬而三省覺今是而昨非嗤黃老之損思信爲善之可歸

慕周妣之遺風美虞妃之聖則仰先哲之高才慕至人之
休德質菲薄而難蹤心恬愉而去惑乃平生之耿介寔禮
義之所遵雖生知之不敏庶積行以成仁懼達人之蓋寡
謂何求而自陳誠素志之難寫同絕筆於獲麟及帝幸江
都臣下離貳有宮人白后曰外聞人人欲反后曰任汝奏
之宮人言於帝帝大怒曰非汝宜言乃斬之後宮人復白
后曰宿衛者往往偶語謀反后曰天下事一朝至此勢去
已然無可救也何用言徒令帝憂煩耳自是無復言者及
宇文文化及之亂隨軍至聊城化及敗沒於竇建德建德妻
曹氏妬悍煬帝妃嬪美人竝使出家并后置於武強縣是

時突厥颉羅可汗方盛其可賀敦即隋義城公主也遣使
迎后建德不敢留遂攜其孫正道及諸女入於虜庭大唐
貞觀四年破突厥皆以禮致之歸于京師賜宅於興道里
二十一年殂詔以皇后禮於揚州合葬於煬帝陵謚曰愍
論曰男女正位人倫大綱三代已還逮於漢晉何嘗不敗
於矯詔而興於聖淑至如后稷稟靈巨迹神元生自天女
克昌來葉異世同符魏諸后婦人之識無足論者文明邪
險幸不墜國靈后淫恣卒亡天下傾城之誠其在茲乎乙
后迫於畏逼有足傷矣昔鉤弋年少子幼漢武所以行權
魏世遂爲常制子貴而其母必死矯枉之義不亦過乎孝

文終革其失良有以也神武肇興齊業武明追蹤周亂溫公之敗邦家馮妃比跡褒后然則汗隆之義蓋有係焉其餘作孽爲責外平內蠹臨塗之近代於齊爲甚周氏粵自文皇逮乎宣帝年踰二紀世歷四君業非草昧之辰事殊權宜之日乃棄同即異以夷亂華汨婚姻之彝序求豺狼之外利旣而報者倦矣施者無馱向之所謂和親未幾已成讎敵竒正之道有異於斯于時武皇雖受制於人未親庶政而謀士韞竒直臣鉗口過矣哉而歷觀前載以外戚而居宰輔者多矣而傾漢室者王族喪周家者楊氏何滅亡之禍若合契焉隋文取鑒於已遠大革前失故母后之家

不罹禍敗獨孤權無呂霍獲全仁壽之前蕭氏勢異梁竇
不傾大業之後至或不隕舊基或更隆克構豈非處之以
道其所致然乎

列傳第二

北史十四

方洽周益周之冕孫粹然校正



列傳第三

北史十五

魏諸宗室

上谷公紇羅

建德公嬰文
貞定侯陸

武陵侯因

長樂王壽樂

望都公頽

曲陽侯素延

順陽公
宜都王目辰

六修

吉陽男比干

江夏公呂
西河公敦

高涼王孤
司徒石

武衛將軍

謂淮陵侯大頭
扶風公處貞

河間公齊
文安公泥

寔君

秦王翰

常山王遵

五世孫亨

陳留王虔

五世孫暉

毗陵王順

遼西公意烈

窟咄

上谷公紇羅神元皇帝之曾孫也初從道武皇帝自獨孤如賀蘭部與弟建勸賀蘭訥推道武為主及道武即帝位以援立功與建同日賜爵為公卒子題賜爵襄城公後進爵為王擊慕容麟於義臺中流矢薨帝以太醫令陰光為

視療不盡術伏法子悉襲降爵爲襄陽公卒贈襄城王神
元後又有建德公嬰文真定侯陸竝任太武特獲封爵
武陵侯因長樂王壽樂竝章帝之後也因從道武平中原
以功封曲逆侯太武時改爵武陵壽樂位選部尚書南安
王改封長樂王文成即位壽樂有援立功拜太宰大都督
中外諸軍錄尚書事矜功與尚書令長孫渴侯爭權竝伏
法

望都公頽昭帝之後也隨道武平中原賜爵望都侯太武
以頽美儀容進止可觀使迎左昭儀於蠕蠕進爵爲公卒
曲陽侯素延順陽公郁宜都王目辰竝桓帝之後也素延

以小統從道武征討諸部初定并州爲刺史道武之驚於
栢肆也并州守將封竇真爲逆素延斬之時道武意欲撫
悅新附悔參合之誅而素延殺戮過多坐免官中山平拜
幽州刺史豪奢放逸左遷上谷太守後賜爵曲陽侯時道
武留心黃老欲以純風化俗雖乘輿服御皆去雕飾素延
奢侈過庭帝深銜之積其過因徵坐賜死郁少忠正允直
文成時位殿中尚書賜爵順陽公父成崩乙渾專權郁從
順德門入欲誅渾渾窘怖遂奉獻文臨朝後復謀殺渾爲
渾所誅獻文錄郁忠正追贈順陽王謚曰簡曰辰文成即
位歷侍中尚書左僕射封南平公乙渾謀亂自辰順陽公

誅殺之事發目辰逃免獻文傳位有定策勲孝文即位進爵宜都王除雍州刺史鎮長安有罪伏法爵除

六修穆帝長子也少兇悖穆帝五年遣六修與輔相衛雄范班及姬澹等救劉琨帝躬統大兵為後繼劉粲懼突圍而走殺傷甚衆帝因大獵壽陽山陳閱皮肉山為變赤穆帝少子比延有寵欲以為後六修出居新平城而黜其母六修有驛騶駿馬日行五百里穆帝欲取以給比延後六修來朝穆帝又命拜比延六修不從穆帝乃坐比延於已所乘步輦使人導從出遊六修望見以為穆帝謁伏路左及至乃是比延慙怒而去穆帝怒伐之帝軍不利六修殺

比延帝改服微行人間有賤婦人識帝遂暴崩桓帝子普根先守于外聞難來赴滅之

吉陽男比干江夏公呂竝道武族弟也比干以司衛監討白澗丁零有功賜爵吉陽男後為南道都將戰沒呂以軍功封江夏公位外都大官大見尊重卒贈江夏王陪葬金陵

高涼王孤平文皇帝之第四子也多才藝有志略烈帝之前元年國有內難昭成如襄國後烈帝臨崩顧命迎立昭成及崩羣臣惑以新有大故昭成來未可果宜立長君次第屈剛猛多變不如孤之寬和柔順於是夫人梁蓋等殺

屈共推孤不肯乃自詣鄴奉迎請身留爲質石季龍義而從之昭成即王位乃分國半部以與之薨子斤失職懷怒構寔君爲逆死於長安道武時以孤勲高追封高涼王諡曰神武斤子真樂頗有戰功後襲祖封明元初改封平陽王薨子禮襲本爵高涼王薨謚懿王子那襲爵拜中都大官驍猛善攻戰正平初坐事伏法獻文即位追那功命子紇紹封薨子大曹性愿直孝文時諸王非道武子孫者例降爵爲公以大曹先世讓國功重高祖真樂勲著前朝改封太原郡公卒無子國除宣武又以大曹從兄子洪威紹恭謙好學爲潁川太守有政績孝靜初在潁川聚衆應西

魏齊神武遣將討平之禮弟陵太武賜爵襄邑男進爵為
子卒子瓌位柔玄鎮司馬瓌子鷲字孔雀孝文末以軍功
賜爵晉陽男武泰元年朱榮至河陰殺戮朝士時鷲與
榮共登高塚俯而觀之自此後與榮合永安初封華山王
莊帝既殺朱榮從子兆為亂帝欲率諸軍親討而鷲與
兆陰通乃勸帝曰黃河萬仞寧可卒度帝遂自安及兆入
殿鷲又約止衛兵帝見逼京邑破皆由鷲之謀孝靜初入
為大司馬加侍中鷲容貌魁壯署帶十圍有武藝才訥少
言性方厚每息直省闥雖暑月不解衣冠曾於侍中高岳
之席咸陽王坦恃力使酒衆皆下之坦謂鷲曰孔雀老武

官何因得王驚荅曰斬反人元愜首是以得之衆皆失色
驚怡然如故興和三年薨贈假黃鉞尚書令司徒公子大
器襲爵後與元瑾謀害齊文襄見害孤孫度道武初賜爵
松滋侯位比部尚書卒子乙斤襲爵襄陽侯獻文崇舊齒
拜外都大官甚優重卒子平字楚國襲世爵松滋侯以軍
功賜艾陵男卒子養孝文時襲爵松滋侯例降侯賜艾陵
伯養性剛毅雖有吉慶事未嘗開口而笑孝文遷都養以
代尹留鎮除懷朔鎮都大將因別賜養酒雖拜飲而顏色
不泰帝曰聞公一生不笑今方隔山當為朕笑竟不能得
帝曰五行之氣偏有所不入六合之間亦何事不有左右

見者無不把腕大笑宣武時為北中郎將帶河內太守長以河橋船組路狹不便行旅又秋水汎漲年常破壞乃為船路遂置空車從京出者率令輸石一雙累以為岸橋闊來往便利近橋諸郡無復勞擾公私賴之歷位度支尚書侍中雍州刺史卒謚曰成長中年以後官位微達乃自尊倨閨門無禮昆季不穆性又貪虐論者鄙之長子子華字伏榮襲爵孝莊初除齊州刺史先是州境數經反逆邢杲之亂人不自保而子華撫集豪右委之管籥眾皆感悅境內帖然而性甚褊急當其急也口不擇言手自捶擊長史鄭子湛子華親友也湛侮罵遂即去之子華雖自悔厲終

不能改在官不為矯潔之行凡有餽贈者辭多受少故人
不戢其取鞠獄訊囚務加仁恕齊人樹碑頌德後除濟州
刺史介朱兆之入洛也齊州城人趙洛周逐刺史丹楊王
蕭贊表濟南太守房士達攝行州事洛周子元顯先隨子
華在濟州邀路改表請子華復為齊州刺史子華母房氏
曾就親人飲食夜還大吐人以為中毒母甚憂懼子華遂
搥吐盡噉之其母乃安尋以母憂還都孝靜初除南兖州
刺史第子思通使關西朝廷使右衛將軍郭瓊收之子思
謂令僕曰速可見殺何為父執國士子華謂子思曰由汝
麤疏令我如此頭叩牀涕泣不自勝子思以手持鬢顧謂

子華曰君惡體氣尋與子思俱賜死於門下外省子思字
衆念性剛暴怕以忠烈自許元天穆當朝權以親從薦為
御史中尉先是兼尚書僕射元順奏以尚書百揆之本至
於公事不應為送御史至子思奏曰案御史令文中尉督
司百寮書侍御史糾察禁內又云中尉出行車輻前驅除
道一里王公百辟避路時經四帝前後中尉二十許人奉
以周旋未曾暫廢府寺臺省竝從此令唯肅宗之世為臨
洮舉哀故兼尚書左僕射臣順不肯與名又不送簿故中
尉臣酈道元舉而奏之而順復啓云尚書百揆之本令僕
納言之貴不宜下隸中尉送名御史尋亦蒙敕聽如其奏

從此迄今使無準一臣初上臺具見其事意欲申請決議
但以權兼斯未宜便爾日復一日遂歷炎涼去月朔旦臺
移尚書索應朝名帳而省稽留不送尋復移催并主吏勿心
爲尚書郎中裴獻伯後注云案舊事御史中尉逢臺郎於
複道中尉下車執板郎中車上舉手禮之以此而言明非
敵體臣既見此深爲恠愕旅省二三未解所以正謂都省別
被新式改易高祖舊命即遣移問事何所依又獲尚書中
郎王元旭報出蔡氏漢官似非穿鑿始知裴王亦規壞典
謨兩人心欲自矯臣案漢書宣秉云詔徵秉爲御史中丞
與司隸校尉尚書令俱會殿廷並專席而坐京師號之爲

三獨坐又尋魏書崔琰傳晉文陽傳嘏傳皆云既爲中丞
百寮震悚以此而言則中丞不揖省郎蓋已久矣憲臺不
屬都坐亦非今日又尋職令云朝會失時即加彈糾則百
官簿帳應送尚臺灼然明矣又皇太子以下違犯憲制皆
得糾察則令僕朝名宜付御史又亦彰矣不付名至否臧
何驗臣順專執未爲平通先朝曲遂豈是正法謹案尚書
郎中臣裴獻伯王元旭等望班士流早參清官輕弄短札
斐然若斯苟執異端忽焉至此此而不綱將墮朝令請以
見事免獻伯等所居官付法科處尚書納言之本令僕百
揆之要同彼浮虛助茲乖失宜明首從節級其罪詔曰國

異政不可據之古事付司檢高祖舊格推處得失以聞尋從子思奏仍為元天穆所忿遂停元顥之敗封安定縣子孝靜時位侍中而死長弟珍字金省襲爵父陵男宣武時曲事高肇遂為帝寵昵彭城王勰之死珍率壯士害之後卒於尚書左僕射平弟長生位游擊將軍卒孝莊時以子天穆貴盛贈司空天穆性和厚美形貌射有能名六鎮之亂尚書令李崇廣陽王深北討天穆以太尉使勞諸軍路出秀容見尔朱榮深相結託約為兄弟未幾改授別將赴秀容為榮腹心除并州刺史及榮赴洛天穆參其始謀莊帝踐阼除太尉封上黨王徵赴京師後增封通前三萬戶

尋監國史錄尚書事開府世襲并州刺史初杜洛周鮮于
修禮為寇瀛冀諸州人多避亂南向幽州前北平府主簿
河間邢杲擁率部曲屯據鄭城以拒洛周葛榮垂將三載
及廣陽王深等敗後杲南度居青州北海界靈太后詔流
人所在皆置命屬郡縣選豪右為守令以撫鎮之時青州
刺史元世雋表置新安郡以杲為太守未報會臺申休簡
授郡縣以杲從子子瑤資蔭居前乃授河間太守杲深恥
恨於是遂反所在流人先為土人陵忽聞杲起逆率來從
之旬朔之間衆踰十萬先是河南人常笑河北人好食榆
葉故齊人號之為諧榆賊杲東掠光州盡海而還又破都

督李叔仁軍詔天穆與齊神武討大破之杲乃請降傳送京師斬之時元顥棄虛陷榮陽天穆聞莊帝北巡自畢公壘北度會車駕於河內尔朱榮以天時炎熱欲還師天穆苦執不可榮乃從之莊帝還宮加太宰羽葆鼓吹增邑通前七萬戶天穆以疎屬本無德望憑藉尔朱爵位隆極當時熏灼朝野王公已下每旦盈門受納財貨珍寶充積而寬柔容物不甚見忌於時莊帝以其榮黨外示優寵詔天穆乘車馬出入大司馬門天穆與榮相倚榮常以兄禮事之世隆等雖榮子姪位遇已重天穆曾言其失榮即加杖其相親任如此莊帝內畏惡之與榮同時見殺節閔初贈

丞相柱國大將軍雍州刺史假黃鉞諡曰武昭子儼襲美才貌位都官尚書及齊受禪聞敕召假病遂怖而卒

西河公敦平文帝之曾孫也道武初從征名居諸將後從征中山所向無前明元時拜中都大官太武時進爵西河公寵遇彌篤卒子撥襲

司徒石平文帝之玄孫也有膽略從太武南討至瓜步山位尚書令雍州刺史歷北部侍郎華州刺史

武衛將軍謂烈帝之第四子也寬雅有將略常從道武征討有功除武衛將軍子烏真膂力絕人隨道武征伐屢有戰功官至鉅鹿太守子興都聰敏剛毅文成時為河間太

守賜爵樂城子為政嚴猛百姓憚之獻文初以子丕貴重
進爵樂城侯謝老歸家帝益禮之賜几杖服物致膳於第
其妻婁氏為東陽王太妃卒追贈定州刺史河間公諡曰
宣子提襲父侯爵提弟丕太武時從駕臨江賜爵興平子
獻文即位累遷侍中丞相乙渾謀反丕以奏聞詔收渾誅
之遷尚書令改封東陽公孝文時封東陽王拜侍中司徒
公丕子超生車駕親幸其第以執心不二詔賜丕入八議
傳示子孫犯至百聽斬戮責數恕之放其同籍丁口雜使
役調求受復除若有姦邪人方便讒毀者即加斬戮尋遷
太尉錄尚書事時淮南王佗淮陽王尉元河東王苟頽竝

以舊老見禮每有大事引入禁中乘步挽杖于朝進退相隨丕佗元三人皆容貌壯偉褻帶十圍大耳秀眉鬚鬢斑白百寮觀瞻莫不祇敬唯荀頰小為短劣姿望亦不逮之孝文文明太后重年敬舊存問周渥丕聲氣高朗博記國事饗宴之際恒居坐端必抗音大言敘列既往成敗帝后敬納焉然諂事要人驕侮輕賤每見王叡符承祖常傾身下之時文明太后為王叡造宅故亦為造甲第第成帝后幸之率百官文武饗宴焉使尚書令王叡宣詔賜丕金印一紐太后親造勸戒歌辭以賜羣官丕上疏贊謝太后令曰臣才隣才隣才臣才君則亡逸於上臣則履冰於下若

能如此太平豈難致乎及丕妻段氏卒謚曰恭妃又特賜
丕金券後例降王爵封平陽郡公求致仕詔不許及車駕
南伐丕與廣陵王羽留守京師竝加使持節詔丕羽曰留
守非賢莫可太尉年尊德重位摠阿衡羽朕之懿弟溫柔
明斷故使二人留守京邑授以二節賞罰在手其祗允成
憲以稱朕心丕對曰謹以死奉詔羽對曰太尉宜專節度
臣但可副貳而已帝曰老者之智少者之決汝何得辭也
及帝還代丕請作歌詔許之歌訖帝曰公傾朕還車故親
歌述志今經構已有次第故暫還舊京願後時亦同茲適
乃詔丕等以移都之事使各陳志燕州刺史穆羆進曰今

四方未平謂可不移臣聞黃帝都涿鹿古聖王不必悉
居中原帝曰黃帝以天下未定故居于涿鹿既定亦遷于
河南廣陵王羽曰臣思奉神規光崇丕業請決之下筮帝
曰昔軒轅請卜兆龜焦乃問天老謂爲善遂從其言終致
昌吉然則至人之量未然審於龜矣帝又詔羣臣曰昔平
文皇帝棄背昭成營居盛樂道武神武應天遷居平城朕
幸屬勝殘之運故移宅中原北人比及十年使其徐移朕
自多積倉儲不令窘乏前懷州刺史青龍前秦州刺史呂
受恩等仍守愚固帝皆撫而荅之辭屈退帝又將北巡不
遷太傅錄尚書事頻表固讓詔斷表啓就家拜授不留守

詔在代之事一委太傅賜上所乘車馬往來府省不雅愛
本風不達新式至於變俗遷洛改官制服禁絕舊言皆所
不願帝亦不逼之但誘示大理令其不生同異至於衣冕
已行朱服列位而不猶常服列在坐隅晚乃稍加弁帶而
不能脩飾容儀帝以丕年衰體重亦不彊責及罷降非道
武子孫及異姓王者雖駁於公爵而利享封邑亦不快帝
南征丕表乞少留思更圖後舉會司徒馮誕薨詔六軍反
旆丕又以熙薨于代都表求鑾駕親臨詔曰今洛邑肇構
跂望成勞開闢暨今豈有以天子之重遠赴舅國之喪朕
縱欲為孝其如大孝何縱欲為義其如大義何天下至重

君臣道懸豈宜苟相誘引陷君不德令僕已下可付法官
貶之又詔以丕爲都督領并州刺史後詔以平陽畿甸改
封新興公初李沖文德望所屬既當時貴要有杖情遂與
子超娶沖兄女即伯尚妹也不前妻子隆同產數人皆與
別居後得宮人所生同宅共產父子情因此偏丕父子大
意不樂遷洛帝之發平城太子恂留於舊京及將還洛隆
與穆泰等密謀留恂因舉兵據涇北丕時以老居并州雖
不預始計而隆超咸以告丕丕外慮不成口乃致難心頗
然之及帝幸平城推穆泰等首謀隆兄弟竝是黨丕亦隨
駕至平城每於測問令丕坐觀與元業等兄弟竝以謀逆

有司奏處擊戮詔以不應連坐但以先許不死之詔躬非
染逆之身聽免死仍爲太原百姓其後妻三子聽隨隆超
母弟及餘庶兄弟皆徙敦煌丕時年垂八十猶自平城力
載隨駕至洛留洛陽帝每遣左右慰勉之乃還晉陽孝文
崩丕自并來赴宣武引見之以丕舊老禮有加焉尋敕留
洛陽後宴于華林都亭特令三子扶持坐起丕仕歷六世
垂七十年位極公輔而還爲庶人然猶心戀京邑不能自
絕人事詔以丕爲三老景明四年薨年八十二詔贈左光
祿大夫冀州刺史諡曰平長子隆先以反誅隆弟乙升超
亦同誅超弟雋邕竝以軍功雋封新安縣男邕封涇縣男

淮陵侯大頭烈帝之曾孫也善騎射擢爲內三郎文成初
封淮陵性謹密帝甚重之位寧北將軍卒贈高平公諡曰
烈

河間公齊烈帝之玄孫也少雄傑魁岸太武征赫連昌太
武馬蹶賊逼帝齊以身蔽捍決死力戰賊乃退帝得上馬
是日微齊帝幾至危殆帝以微服入其城齊固諫不許乃
與數人從帝入城內旣覺諸門悉閉帝及齊等因入其宮
中得婦人裙繫之槩上帝乘而上因此得拔於齊有力焉
賜爵浮陽侯從征和龍以功拜尚書進爵爲公後與新興
王俊討禿髮保周坐事免官爵宋將裴方明陷仇池太武

復授齊前將軍與建興公古弼討之遂剋仇池威振羌氏
復賜爵河間公與武都王楊保宗對鎮駱谷時保宗弟文
德說閉險自固有期矣秦州主簿邊因知之密告齊展詣
保宗呼曰古弼至欲宣詔保宗出齊叱左右扶保宗上馬
馳驛送臺諸氏遂推文德爲主求援於宋宋遣將房亮之
符昭啖龍等率衆助文德齊擊斬殺龍禽亮之氏遂平以
功拜內都大官卒謚敬王長子陵襲爵陵性抗直天安初
爲乙渾所害陵弟蘭以忠謹見寵孝文初賜爵建陽子卒
於武川鎮將子志字猛略少清辯彊幹歷覽書傳頗有文
才爲洛陽令不避彊禦與御史中尉李彪爭路俱入見面

陳得失彪言御史中尉辟承華蓋駐論道劔鼓安有洛陽
令與臣抗衡志言神鄉縣主普天之下誰不編戶豈有俯
同衆官趨避中尉孝文曰洛陽我之豐沛自應分路揚鑣
自今以後可分路而行及出與彪折度量道各取其半帝
謂邢巒曰此兒竟可所謂王孫公子不鏤自彫巒曰露竹
霜條故多勁節非巒則鳳其在本枝也貞外郎馮俊昭儀
之弟恃勢恣搢所部里正志令主史收繫處刑除官由此
忤旨左遷太尉主簿俄爲從事中郎車駕南征帝微服觀
戰所有箭欲犯帝志以身鄣之帝便得免矢中志目因此
一目喪明以志行恒州事宣武時除荊州刺史還朝御史

中尉王顯奏志於在州日抑買良人為婢兼乘請供朝會
赦免明帝初兼廷尉卿後除楊州刺史賜爵建忠伯志在
州威名雖減李崇亦為荊楚所憚尋為雍州刺史晚年耽
好聲伎在楊州日侍側將百人器服珍麗冠於一時及在
雍州逾尚華侈聚歛無極聲名遂損及莫折念生反詔志
為西征都督討之念生遣其弟天生屯龍口與志相持為
賊所乘遂棄大衆奔還岐州賊遂攻城州刺史裴芬之疑
城人與賊潛通將盡出之志不聽城人果開門引賊鑠志
及芬之送念生見害節閔初贈尚書僕射太保

扶風公虔真烈帝之後也少以壯烈聞位殿中尚書賜爵

扶風公委以大政甚見尊禮吐京胡曹僕渾等叛招引朔方胡為援虜真與高涼王那等討滅之性貪婪在軍烈暴坐事伏法

文安公泥魏之疎族也性忠直有智畫道武厚遇之賜爵文安公拜安東將軍卒子屈襲爵明元時居門下出納詔命性明敏善奏事每合上旨賜爵元城侯加功勞將軍與南平公長孫嵩白馬侯崔密等竝決獄訟明元東巡命屈行右丞相山陽侯奚斤行左丞相命掌軍國甚有聲譽後吐京胡與離石胡出以兵等叛置立將校外引赫連屈丐屈督會稽劉黎永安侯魏勤捍之勤沒於陣黎墜馬胡執

送屈丐唯屈衆猶存明元以屈沒失二將欲斬之時并州刺史元六頭荒淫怠事乃赦屈令攝州事屈嗜酒頗廢政事帝積其前後失檻車徵還斬於市子磨渾少爲明元所知元紹之逆也明元潛隱於外磨渾與叔孫詐云明元所在紹使帳下二人隨磨渾往覓爲逆磨渾旣得出便縛帳下詣明元斬之帝得磨渾大喜因爲羽翼以勲賜爵長沙公拜尚書出爲定州刺史卒

昭成皇帝九子庶長曰寔君次曰明元帝次曰秦王翰次曰閼婆次曰壽鳩次曰紇根次曰地干次曰力真次曰窟咄

寔君性愚多不仁昭成季年苻堅遣其行唐公苻洛等來
寇南境昭成遣劉庫仁逆戰於石子嶺昭成時不勝不能
親勒衆軍乃率諸部避難陰山度漠北高車四面寇抄復
度漠南苻洛軍退乃還雲中初昭成以弟孤讓國乃以半
部授孤孤子斤失職懷怨欲伺隙爲亂獻明皇帝及秦明
王翰皆先終道武年甫五歲慕容后子閼婆等雖長而國
統未定斤因是說寔君曰帝將立慕容所生欲先殺汝是
以頃來諸子戎服夜以兵伏遶廬舍伺便將發時苻洛等
軍猶在君子津夜常警備諸皇子挾仗彷徨廬舍寔君以
斤言爲信乃盡殺諸皇子昭成亦暴崩其夜諸皇子婦及

宮人奔告洛軍堅將李柔張武勒兵內逼部衆離散苻堅聞之召燕鳳問其故以狀對堅曰天下之惡一也乃執是君及斤輶之長安寔君孫勿期位定州刺史賜爵林慮侯卒子六狀眞定侯

秦王翰少有高氣年十五便請征伐昭成壯之使領騎二千長統兵號令嚴信多有剋捷建國十五年卒道武即位追贈秦王諡曰明子儀長七尺五寸容貌甚偉美髯有筭略少能舞劒騎射絕人道武幸賀蘭部侍從出入登國初賜爵九原公從破諸部有謀戰功及帝將圖慕容垂遣儀觀釁垂問儀道武不自來之意儀曰先人以來世據北土

子孫相承不失其舊乃祖受晉正爵稱代王東與燕世爲
兄弟儀之奉命理謂非失垂壯其對因戲曰吾威加四海
卿主不自見吾云何非失儀曰燕若不修文德欲以兵威
自強此乃本朝將帥之事非儀所知也及還報曰垂死乃
可圖今則未可帝作色問之儀曰垂年已暮其子寶弱而
無威謀不能決慕容德自負才氣非弱主之臣輿將內起
是可計之帝以爲然後改封平原公道武征衛辰儀出別
道獲衛辰尸傳首行宮帝大喜徙封東平公命督屯田於
河北自五原至稠陽塞外分農稼大得人心慕容寶之寇
五原儀躡據朔方要其還路及并州平儀功多遷尚書令

從圍中山慕容德敗也帝以晉麟妻周氏賜儀并其僮僕財物尋遷都督中外諸軍事左丞相進封衛王中山平復遣儀討鄴平之道武將還代都置中山行臺詔儀守尚書令以鎮之遠近懷附尋徵儀以丞相入輔又從征高車儀別從西北破其別部又從討姚平有功賜以絹布綿牛馬羊等儀膂力過人弓力將十石陳留公虔稍大稱異時人云衛王弓桓王稍太武之初育也道武喜夜召儀入曰卿聞夜喚乃不恠懼乎儀曰恠則有之懼實無也帝告以太武生賜儀御馬御帶縑錦等先是上谷侯岌張袞代郡許謙等有名于時初來入軍聞儀待士先就儀儀並禮之共

談當世之務謙等三人曰平原公有大才不世之略吾等
宜附其尾道武以儀器望待之尤重數幸其第如家人禮
儀矜功恃寵遂與宜都公穆崇伏甲謀亂崇子遂留在伏
士中道武召之將有所使遂留聞召恐發踰牆告狀帝祕
而恕之天賜六年天文多變占者云當有逆臣伏尸流血
帝惡之頗殺公卿欲以厭當天災儀內不自安單騎遁走
帝使人追執之遂賜死葬以百姓禮儀十五子纂五歲道
武命養於宮中恩與諸皇子同太武踐阼除定州刺史封
中山公進爵爲王賜步挽几以優異之纂好酒愛佞政以
賄成大武殺其親嬖人後悔過修謹拜內大將軍居官清

約簡愼更稱廉平纂於宗屬最長宗室有事成就諮焉薨
諡曰簡纂弟良性忠篤明元追錄儀功封南陽王以紹儀
後良弟幹善弓馬以騎從明元於白登之東北有雙鷁飛
鳴於上帝命左右射之莫能中鷁遊飛稍高幹以二箭下
雙鷁帝賜之御馬弓矢金帶一以旌其能軍中於是號幹
爲射鷁都將從太武南巡進爵新蔡公文成即位拜宰官
尚書卒諡曰昭子禎膽氣過人太武時爲司衛監從征蠕
蠕忽遇賊別部多少不敵禎乃就山解鞍放馬以示有伏
賊果疑而避之孝文初賜爵沛郡公後拜南豫州刺史大
胡山蠻時鈔掠前後守牧多羈縻而已禎乃召新蔡襄城

蠻首使之觀射先選左右能射者二十餘人禎自發數箭皆中然後命左右以次而射先出一囚犯死罪者使參射限命不中禎即責而斬之蠻魁等伏伎畏威相視股慄又預敎左右取死囚十人皆著蠻衣云是鈔賊禎乃臨坐僞舉目瞻天微有風動禎謂蠻曰風氣少暴似有鈔賊入境不過十人當在西南五十里許即命騎追掩果縛送十人禎告諸蠻曰爾鄉里作賊如此合死以不蠻等皆叩頭曰合方死禎即斬之因慰喻遣還自是境無暴掠淮南人相率投附者三千餘家置之城東汝水之側名曰歸義坊初豫州城豪胡丘生數與外交通及禎爲刺史丘生嘗有犯

懷恨圖爲不軌詐以婚進城人告云刺史欲遷城中大家
送之向代共謀翻城城人石道起以事密告禎速掩丘生
并諸預謀者禎曰吾不負人人何以叛但丘生誑誤若即
收掩衆必大懼吾靜以待之不久自當悔服語未訖而城
中三百人自縛詣州門陳丘生譎誑之罪而丘生單騎逃
走禎恕而不問後徵爲都牧尚書卒贈侍中儀同三司諡
簡公有八子第五子瑞初瑞母尹氏有娠致傷後晝寢夢
一老翁具衣冠告之曰吾賜汝一子汝勿憂也寤而私喜
又問筮者筮者曰大吉未幾而生瑞禎以爲協夢故名瑞
字天賜位太中大夫卒贈太常卿儀第烈剛武有智略元

紹之逆百寮莫敢有聲唯烈行出外詐附紹募執明元紹
信之自延秋門出遂迎立明元以功進爵陰平王薨諡曰
熹子求襲第道子位下大夫道子子洛位羽林幢將洛子
乞中散大夫乞子晏孝靜初累遷吏部尚書平心不撓時
論稱之出爲瀛州刺史在任未幾百姓欣賴將天樂之逆
見引詔錄送定州賜死晏好集圖籍家書多祕閣諸有假
借咸不逆其意亦以此見稱烈弟觚勇烈有膽氣少與兄
儀從道武侍衛左右使於慕容垂垂末年政在羣下遂止
觚以求賂道武絕之觚率左右馳還爲垂子寶所執垂待
之更厚因留心學業誦讀經書數十萬言垂國人咸稱重

之道武之討中山慕容普麟遂害觚以固衆心帝聞之哀
慟及平中山發普麟塚斬其尸收議害觚者傳高霸稽
等皆夷五族以大刃剉殺之乃葬觚追諡秦愍王封子夔
爲豫章王以紹觚

常山王遵壽鳩之子也少而壯勇不拘小節道武初有佐
命勲賜爵略陽公慕容寶之敗也別率騎七百邀其歸路
由是有參合之捷及平中山拜尚書左僕射加侍中領勃
海之合口及博陵勃海羣盜起遵討平之遷州牧封常山
王遵好酒色天賜四年坐醉亂失禮於太原公主賜死葬
以百姓禮子素明元從母所生特見親寵太武初復襲爵

休屠郁原等叛素討之斬渠率徙千餘家於涿鹿之陽立平原郡以處之及平統萬以素有威懷之略拜假節征西大將軍以鎮之後拜內都大官文成即位務崇寬政罷諸雜調有司奏國用不足固請復之唯素曰臣聞百姓不足君孰與足帝善而從之素宗屬之懿又年老帝每引入訪以政事固辭疾歸第雅性方正居官五十載終始若一時論賢之薨諡曰康陪葬金陵配饗廟廷長子可悉陵年十七從太武獵逐一猛獸陵遂空手搏之以獻帝曰汝才力絕人當爲國立功立事勿如此也即拜內行阿干又從平涼州沮渠茂虔令一驍將與陵相擊兩槩皆折陵抽箭射

之隊馬陵恐其救至未及拔劍以刀子突其頸使身首異處帝壯之即日拜都幢將封暨陽子卒于中軍都將弟陪斤襲爵坐事國除陪斤子昭小字阿倪尚書張彝引兼殿中郎孝文將為齊郡王蘭舉哀而昭乃作宮懸帝大怒詔曰阿倪愚騃誰引為郎於是黜彝白衣守尚書昭遂停廢宣武時昭從弟暉親寵用事稍遷左丞宣武崩于忠執政昭為黃門郎又曲事之忠專權擅威枉陷忠賢多昭所指導也靈太后臨朝為尚書河南尹龔而佞矣理務峭急所在患之尋出為雍州刺史在州貪虐大為入害後入為尚書謫事劉騰進號征西將軍卒贈尚書左僕射納貨元义

所以贈禮優越子玄字孝道以節儉知名孝莊時為洛陽令及節閔即位玄上表乞葬莊帝時議善之後除尚書左丞孝武帝即位以孫騰為左僕射騰即齊神武心膂仗入省玄依法舉劾當時咸為玄懼孝武重其強正封臨淄縣子及從入關封陳郡王位儀同三司加開府薨諡曰平昭弟紹字醜倫少聰慧遷尚書右丞紹斷決不避強禦宣武詔令檢趙修獄以修佞幸因此遂加杖罰令其致死帝責紹不重聞紹曰修姦佞甚於董賢臣若不因釁除之恐陛下復闕哀帝之名以其言正遂不罪焉及出廣平王懷拜紹賀曰阿翁乃皇家之正直雖朱雲沒黯何以仰過紹曰

但恨戮之稍晚以為愧耳卒於涼州刺史陪斤弟忠字仙
德以忠謹聞孝文時累遷右僕射賜爵城陽公加侍中鎮
西將軍有翼贊之勤百寮咸敬之太和四年病篤辭退養
疾於高柳輿駕親送都門之外羣寮侍臣執別者莫不涕
泣及卒皆悼惜之諡曰宣命有司為立碑銘子盛字始興
襲爵位謁者僕射卒子懋字伯邕襲爵降為侯從駕入關
封北平王薨贈尚書左僕射諡曰貞慧子陟字景升開府
儀同三司弟順字敬叔從孝武入關封濮陽王位侍中及
武帝崩秘未發喪諸人多舉廣平王為嗣順於別室垂涕
謂周文曰廣平雖親年德並茂不宜居大寶周文深然之

因宣國諱上南陽王尊號以順為中尉行雍州事又加開
府儀同三司秦州刺史順善射初孝武在洛於華林園戲
射以銀酒卮容二升許懸於百步外命善射者十餘人共
射中者即以賜之順發矢即中帝大悅并賞金帛順仍於
箭孔處鑄一銀童足蹈金蓮手持刻炙遂勒背上序其射
工子偉字子猷有清才大統十六年封南安郡王及尉遲
迴伐蜀以偉為司錄書檄文言皆偉所為六官建拜師氏
下大夫改淮南縣公周明帝初拜師氏中大夫受詔於驥
驎殿刊正經籍建德中累遷小司寇為使主報聘於齊是
秋武帝親戎東討偉遂為齊所留齊平偉方見釋加授上

開府後除襄州刺史位大將軍偉性溫柔好虛靜篤學愛
文初自鄴還庾信贈其詩曰梁亡垂棘反齊平寶鼎歸為
辭人所重如此後疾卒盛弟壽興少聰慧好學宣武初為
徐州刺史在官貪虐失於人心其從兄侍中暉深害其能
因譖之於帝詔尚書崔亮馳駟檢覈亮發日受暉旨遂鞭
撻三寡婦令其自誣稱壽興壓己為婢壽興終恐不免乃
令其外弟中兵參軍薛修義將車十乘運小麥經其禁之
旁壽興因踰牆出修義以大木函盛壽興其上加麥載之
而出遂至河東匿修義家逢赦乃出見帝自陳為暉所譖
帝亦更無所責初壽興為中庶子時王顯在東宮賤因公

事壽興杖之四十及顯有寵為御史中尉奏壽興在家每有怨言誹謗朝廷因帝極飲無所寤悟遂奏其事命帝注可直付壽興賜死帝書半不成字當時見者亦知非本心但懼暉等威不敢申拔及行刑日顯自往看之壽興命筆自作墓誌銘曰洛陽男子姓元名景有道無時其年不求餘文多不載顧謂其子曰我棺中可著百張紙筆兩枚吾欲訟顯於地下若高祖之靈有知百日內必取顯如遂無知亦何足戀及宣武崩顯尋被殺壽興之死時論亦以為前任中尉彈高闕諛諷所致靈太后臨朝三公郎中崔鴻上疏理壽興詔書追雪贈豫州刺史謚曰莊子最字幹從

孝武入關封樂平王位侍中兼尚書左僕射加特進

壽興弟益生少亡子毗字休弼武帝之在藩邸少親之及即位出必陪乘入於臥內及帝與齊神武有隙時議者各有異同或勸天子入夷或言與齊神武決戰或云奔梁唯毗數人以關中帝王桑梓懇勸叩頭請西入策功論賞毗與領軍斛斯椿等十三人爲首封魏郡王時王者邑止一千戶唯毗邑一千五百齊神武宣告關東云將天子西入事起元毗雖百赦不在原限薨諡曰景子綽忠弟德封河閒公卒於鎮南將軍贈曹州刺史德子惺潁川太守卒於光州刺史諡曰恭子嶷字子仲孝武初授兗州刺史于時

城人王奉伯等相扇謀逆棄城出走縣門發斷疑要而出
詔齊州刺史尉景本州刺史蔡雋各部在州士往討之疑
返復任封濮陽縣伯孝靜時轉尚書令攝選部疑雖居重
任隨時而已薨於瀛州刺史贈司徒公謚曰靖懿悝弟暉
字景龍少沉敏頗涉文史宣武即位爲給事黃門侍郎初
孝文遷洛舊貴比皆難移時欲和衆情遂許冬則居南夏便
居北宣武頗惑左右之言外人遂有還北之問至乃榜賣
田宅不安其居暉乃請閒言事具奏所聞曰先皇移都以
百姓戀土故發冬夏二居之詔權寧物意耳乃是當時之
言先皇深意且比來遷人安居歲久公私計立無復還情

伏願陛下終高祖既定之業勿信邪臣不然之說帝納之
再遷侍中領右衛將軍雖無補益深被親寵凡在禁中要
密之事暉別奉旨藏之於櫃唯暉入乃開其餘侍中黃門
莫有知者侍中盧昶亦蒙恩眊故時人號曰餓彪將軍飢
鷹侍中遷吏部尚書納貨用官皆有定價大郡二千匹次
郡一千匹下郡五百匹其餘官職各有差天下號曰市曹
出爲萬州刺史下州之日連車載物發信都至湯陰聞首
尾相屬道路不斷其車少脂角即於道上所逢之牛生截
取角以充其用暉檢括下戶聽其歸首出調絹五萬匹然
聚斂無極百姓患之明帝初徵拜尚書左僕射詔攝吏部

選事後詔暉與任城王澄京兆王愉東平王匡共決門下
 大事暉又上書論政要其一曰御史之職務使得賢必得
 其人不拘階秩久於其事責其成功其二曰安人寧邊觀
 時而動頃來邊將亡遠大之略貪萬一之功楚梁之好未
 聞而蠶婦之怨屢結斯乃庸人所爲銳於姦利之所致也
 平吳之計自有良圖不在於一城一戍也又河北數州國
 之基本飢荒多年戶口流散方今境上兵復徵發即如此
 日何易舉動愚謂數年以來唯宜靜邊以息召役安人勸
 農惠此中夏請嚴敕邊將自今有賊戍求內附者不聽輒
 遣援接日須表聞違者雖有功請以違詔書論三曰國之

資儲唯籍河北飢饉積年戶口逃散生長姦詐因生隱藏
出縮老小妄注死收人租調割入於己人困於下官損
於上自非更立權制善加檢括損耗之來方在未已請求
其議明宣條格帝納之暉雅好文學招集儒士崔鴻等撰
錄百家要事以類相從名爲科錄凡二百七十卷上起伏
義迄於晉凡十四代暉疾篤表上之卒賜東園秘器贈使
持節都督中外諸軍事司空公謚曰文憲將葬給羽葆班
劍鼓吹二十人羽林百二十人弼字宗輔性和厚美容
儀以莊帝舅子壻特封廣川縣子天平初累遷尚書令弼
妹爲孝武所納以親情見委禮遇特隆歷中書監錄尚書

事位特進宗師齊受禪除左光祿大夫天保三年卒十年
諸子與諸元同誅死弼弟子士將有巧思至齊武成時位
將作大匠德弟贊頗有名譽好陳軍國事宜初置司州以
贊爲刺史賜爵上公侯孝文戒贊化畿甸可宣孝道必令
風教洽和文禮大備自今有不孝不悌者比其門槩以
刻其柱又詔曰司州刺史官尊位重職摠京畿選屬懿親
以允具瞻之望但諸王年少未閑政體故以授贊庶能助
暉道化今司州始立郡縣初置公卿已下皆有本屬可人
率子弟用相展敬於是賜名曰贊詔贊乘步挽入殿門加
太子少師遷左僕射孝文將謀遷洛諸公多異同唯贊贊

成大策帝每歲南伐執手寄以後事卒贈衛將軍僕射如
故後以留守贊輔之功進封晉陽縣伯贊弟淑字買仁彎
弓三百斤善騎射孝文時爲河東太守河東俗多商賈罕
事農桑人至有年三十不識耒耜淑下車勸課躬往教示
二年閒家給人足爲之謠曰泰州河東杼柚代春元公至
止田疇始理卒於平城鎮將諡曰靜有七子季海字元泉
兄弟中最有名譽位洛州刺史季海妻司空季冲之女莊
帝從母也賜爵唐郡君政在尔朱禍難方始勸季海爲外
官以避纖介及孝莊之難季海果以在藩得免從孝武入
關封馮翊王位中書令雍州刺史遷司空病薨諡曰穆子

亨字德良一名孝才遇周齊分隔時年數歲與母李氏在洛陽齊神武以亨父在關中禁固之其母遂稱凍餒得就食湯陰託大豪李長壽攜亨及孤姪數人得至長安周文以功臣子甚禮之大統末襲爵馮翊王累遷勳州刺史改封平涼王周受禪例降爲公隋文帝受禪自洛州刺史徵拜太常卿尋出爲衛州刺史在職八年風化大洽以老病乞骸骨吏人詣闕上表請留上嗟歎者久之其年亨以篤疾重請還京上令使者致醫藥間動靜相望於道卒于家諡曰宣

陳留王虔紇根之子也登國初賜爵陳留公與衛王儀破

黜弗部從衛辰慕容寶來寇虜絕其左翼寶敗垂恚憤來
桑乾虜勇而輕敵於陳戰沒虜姿氣魁傑武力絕倫每以
矛細短大作之猶患其輕復綴鈴於刃下其弓力倍加常
人以其殊異代京武庫常存而忘之虜常以稍刺人遂貫
而高舉又嘗以一手頓稍於地馳馬偽退敵人爭取引不
能出虜引弓射之一箭殺二三人搃稍之徒亡魂而散徐
乃令人取稍而去每從征討及為偏將常先登陷陣勇冠
當時敵無衆寡莫敢抗其前者及薨舉國悲歎為之流涕
道武追惜傷慟者數焉追謚陳留桓王配饗朝廷封其子
悅為朱提王悅外和內佞道武常以桓王死王事特加親

寵為左將軍襲封後為宗師悅恃寵驕矜每謂所親王洛
生之徒言曰一旦宮車晏駕吾止避衛公除此誰在吾前
衛王儀美髯為內外所重悅故云初姚興之贖狄伯支悅
送之路由鴈門悅因背誘姦豪以取其意後遇事譴逃亡
投鴈門規收豪傑欲為不軌為土人執送帝恕而不罪明
元即位引悅入侍仍懷姦計說帝云京師雜人不可保信
宜誅其非類者又云鴈門人多詐并可誅之欲以雪其私
忿帝不從悅內自疑懼懷刃入侍謀為大逆叔孫俊疑之
竊視其懷有刃執而賜死弟崇太武詔令襲桓王爵崇性
沉厚初衛王死後道武欲敦宗親之義詔引諸王子弟入

宴常山王素等三十餘人咸謂與衛王相坐疑懼皆出逃遁將奔蠕蠕唯崇獨至道武見之甚悅厚加禮賜遂寵敬之素等於是亦安久之拜并州刺史有政績從征蠕蠕別督諸軍出大澤越涿耶山威懾漠北薨謚曰景王子建襲降爵為公位鎮北將軍懷荒鎮大將卒建子琛位恒肆二州刺史琛子翌尚書左僕射翌子暉

暉字叔平鬚眉如畫進止可觀好涉獵書記少得美名於京下周文禮之命與諸子遊處每同硯席情契甚厚再遷武伯下大夫時突厥屢為寇患朝廷將結和親令暉買錦綵十萬使突厥暉說以利害可汗大悅遣其名王隨獻方

物俄拜儀同三司周武帝之甥突厥后令暉致禮授開府
轉司憲大夫及平關東使暉安集河北封義寧子隋文帝
總百揆加上開府進爵為公開皇初拜都官尚書兼領太
僕奉詔決杜陽水灌三時原溉鹵之地數千頃入賴其
利再遷兵部尚書監漕渠之役未幾坐事免頃之拜魏州
刺史頗有惠政後以疾去職卒于京師帝嗟悼久之敕鴻
臚監護喪事謚曰元子肅嗣位先祿少卿肅弟仁器性明
敏位日南郡丞建弟嫡子祚字龍壽宣武校藝每於歲暮
詔令教習講武初建以子罪失爵祚欲求本封有司奏聽
祚襲公其王爵不輕共求更議詔從之卒於河州刺史節

余長壽

武亭以邀軍路師人患之論曰今大風既勁若令推草車
方軌竝進乘風縱煙火以精兵自後乘之破之必矣從之
斬康祖傳首行宮文成即位除秦州刺史進爵隴西公卒
諡曰定公子琛襲爵

毗陵王順地干之子也性疎佷登國初賜爵南安公及道
武討中山留順守京師栢肆之敗軍人有亡歸者言大軍
奔散不知帝所在順聞之欲自立納莫題諫乃止時賀力
眷等聚衆作亂於陰館順討之不克乃從留官自白登南
入繁時故城阻灋水爲固以寧人心道武善之進封爲王
位司隸校尉道武好黃老數召諸王及朝臣親爲說之在

坐莫不祗肅唯順獨坐寐不顧而唾帝怒廢之以王薨於家

遼西公意烈力真之子也先沒於慕容垂道武征中山棄妻子迎於井陘及平中原有戰獲勲賜爵遼西公除廣平太守時和跋爲鄴行臺意烈性雄耿自以帝屬恥居跋下遂陰結徒黨將襲鄴發覺賜死子拔干博知古今父雖有罪道武以拔干宗親委之心腹有計略屢効忠勤明元踐阼除勃海太守吏人樂之賜爵武遂子轉平原鎮將得將士心卒諡曰靈公子受洛襲進爵武邑公卒子叱奴武川鎮將叱奴子洪超頗有學涉大業賊亂之後詔洪超持節

兼黃門侍郎綏慰異部還上言異土寬廣界去州六七百里負海險遠宜分置一州鎮遏海曲朝議從之後遂立滄州卒於北軍將光祿大夫意烈弟勃善射御以勲賜爵彭城公卒諡曰謚陪葬金陵長子粟龍太武時督諸軍屯漠南蠕蠕表聞粟亮直善馭衆撫恤將士必與之同勞逸征和龍以功進封爲王薨陪葬金陵粟弟渾少善弓馬太武嘉之會有諸方使命渾射獸三頭發皆中時舉坐咸以爲善及爲宰官尚書頗以驕縱爲失坐事免徙長社爲人所害子庫汗爲羽林中郎將從北巡有兔起乘輿前命庫汗射之應弦而斃太武悅賜一金兔以旌其能文成起景

穆廟賜爵陽豐侯獻文即位復造文成廟拜殿中給事進
爵為公庫汗明於斷決每奉使察行州鎮折獄以情所歷
皆稱之秦州父老詣闕乞庫汗為刺史者前後千餘人朝
廷許之未及遣遇病卒子古辰襲

窟咄昭成崩後符洛以其年長逼徙長安符堅禮之教以
書學因亂隨慕容永東遷永以為新興太守劉顯之敗遣
弟允望等迎窟咄遂逼南界於是諸部騷動道武右于桓
等謀應之同謀入單于以告帝帝慮駭人心沉吟未發
後三日桓以謀白其舅穆崇又告之帝乃誅桓等五人餘
莫顯等七姓悉原不問帝慮內難乃北踰陰山幸賀蘭部

遣安同及長孫漫徵兵於慕容垂賀曼亡奔窟咄安同間
行遂達中山慕容垂遣子賀麟步騎六千以隨之安同與
垂使人蘭紇俱還達牛川窟咄兄子意烈捍之安同乃隱
藏於商賈囊中至暮乃入空井得免仍奔賀麟軍既不至
而稍前逼賀染干賀染干陰懷異端乃為窟咄來侵北部
人皆驚駭莫有固志於是北部大人叔孫普洛郎及諸烏
丸亡奔衛辰賀麟聞之遽遣安同朱譚等來既知賀麟軍
近衆乃少定道武自弩山率牛川窟咄進屯高柳道武復
使安同詣賀麟因尅會期安同還帝踰參合出代北與賀
麟會於高柳窟咄窮迫望旗奔走遂為衛辰殺之帝悉收

其衆賀麟執帝別歸中山

論曰魏氏始自幽都肇基帝業上谷公等分枝若木疏派
天潢或績預經綸大開土宇或迹同凶悖自致殲夷其禍
福之來唯人所召至如神武之不事黃屋高揖萬乘義感
隣國祚隆帝統太伯延陵未足多也高涼讓國之胤子那
猛壯之風或大位未加或功不贖罪褻德圖勞其義為闕
松滋氣幹相承聲迹俱顯天穆得不以道任過其量持盈
必悔殺身為幸武衛父子兼將丕略始見器重終以姦棄
不足觀矣河間扶風武烈宣著宗子之可稱乎衛王英風
猛槩折衝見重謀之不臧卒以自喪秦王體度恢偉陳留

北史列傳三
卅四
膽氣絕倫亡身強寇志力不展惜哉常山勇冠威屬與魏
升降亦以優乎陰平忠烈蒲陰器宇榮寵兼萃蓋有由焉
毗陵踈佷遼西捐介全身保位固亦難矣苻堅之輟寔君
衛辰之誅蜜咄逆子賊臣蓋亦天下之惡一焉

列傳第三

北史十五